


DS
793
S32C523
1865
v. 8

册	8
卷	10



稷山縣志卷之十

藝文下

詩撰著總目附

國朝

楊公去思碑記

平陽同知

錢茂秦

慈谿人

順治十一年歲在甲午七月既望余自烏延貳於平

水郡羣屬三十有四至之日羣長咸集吾鄉姚君敬

輿以稷山旅而進寒溫竟詢及吾寧波府楊九春翁

異之曰何爲其然也曰楊公前是爲稷山令仁入人

深人思不忘遇浙人必詢嘗語以浙之郡十許須屬

彼寧波者然後詳今獲藉以傳副士若民望亦緣也
顧余庚寅春辭家就烏延整整程半萬年五閱家書
且抵金不恒有若未遑及吾公祖政蹟然者何以爲
士若民道無已見稷言稷亦可夫稷一時若是思之
曷不同其後世知之稷一邑果若是知之曷不并宰
是邑者與聞之於以見明德在人必不歛沒而稷人
民之有情其久且篤也當文以壽諸石曰非不欲之
謂其阿唇齒好奈何曰不然余文焉民石焉君董焉
不於其爲稷之日而於其爲寧波之日乃所謂去思

也爰爲之節畧成韵俾可比於古之謳歌舜者故猶
是晉地也其道途口碑以俱遠矣其韻言曰繫我稷
之再康兮繇就燁而出湯其纍若而視兒女行兮又
去之於天一方攀轅不得以膚忘兮徧所思憑風揚
思將終身之穰兮疇南晦以峙粳思御祈寒之裳兮
疇變海以盡桑思照屋之逃亡兮疇光明而致我首
耶於鄉思田原每每其蕪而滄兮疇築爲圃場思呻
吟與痍瘡兮疇復其常而車牛負擔樂急公競輸之
倉思夜無犬嗥民不慌獐兮疇撫字焉如傷思少者

習牛犢之在佩而尙遠於縹緲兮疇掖而躋諸千仞
之墻思富方穀之未興兮疇旦暮親炙其耿光徧所
思憑風揚浩浩乎天與之元地與黃標百世史而傳
芳子子孫孫而昌兮繼序其皇公號九春諱之柄登
順天己卯榜良鄉其錦里也

紀吳伯宗尋弟事

大學士
李光地
安溪人

吳伯宗山西稷山縣民弱歲喪父母兩弟俱幼相依
一日其少者忽失去伯宗訪求數年未得其次者忽
又失去伯宗哀切不能已遠近尋覓稍有音問則以

負販爲名不憚千里庶幾得之後其少者得之都中
爲高姓人僕高遇之頗厚且感其兄之義謂之曰吾
爲子善撫以待子方求次弟有行來時可併歸也時
已微聞其次之信乃在寧古塔將軍所部下寧古塔
者北去遼陽盛京數千里爛胛天明墮指裂膚之地
國家所以處罪人也伯宗慨然與其季別曰吾得仲
則偕返不返則併吾之妻子屬子矣舊都郊關出入
有禁限伯宗率以計達至則跡其弟果在也赴將軍
訟之使部下將領質焉中閒伯宗忽躍起不跪將領

怒而撲之血被面伯宗徐曰民非敢與官抗適見畧
吾弟者奴吾弟者皆王法不宥之人也美衣帽平立
官側民弟良家子爲奸人誘掠萬里投命官不急明
其冤而以罪囚相待俯伏詰訊民是以不服將領意
悟且懼其還返閭閻白之將軍而歸之自出關至入
歷三時其在寧古塔正冬月節候極寒足凍盡見骨
兄弟相扶數日行冰雪中僵仆幾不能起嗚呼其懇
勤可書也李子曰兄弟相失相求人情之常非高行
也自俗化之衰倫理日薄兄弟尤甚及父之存而有

尤閔不相能者逮乎同氣而分富則競財產貧則計
錙銖妻子奪之外人間之漸而陌路不如故袁原隰
急患難者聖人猶以爲情之至而系之經也伯宗之
求弟久而篤勞而決及其出關訣季之言則之死而
不怨人盡伯宗世豈有手足相忘之事哉伯宗頗識
字嘗於旅店讀論語至父母之年則歔歔哭失聲嗚
呼小宛之哀興於明發能友者未有不厚於孝者也
伯宗雖農民在京師相國澤州陳公高其誼旣與爲
禮又爲詩七十六韵以歌之縉紳士友多就見之者

夫農之秀則升爲士古之制也冀缺茅容路側耕夫
以內行之敦爲有道者別識卒爲賢臣名士青史爛
焉余誠未知伯宗志質何如然願伯宗自此永昆弟
之好無使異日鄉之人曰昔之求之如此其勤也而
後乃稍衰且曰兄之念之如此其至也而弟乃不類
則雖未澤於詩書文以禮樂而使鄉黨嘉尚以終始
宅里之表王政其舍諸

烈女葉葉小傳

學正
張垣
邑人

烈女葉葉先慈朱孺人之從婢也以其來自舅家姓

氏里居皆無從考自幼侍先慈小心勤謹從無違誤
先慈頗憐惜之葉葉長余數歲余多疾先慈以撐持
內政常付之提攜先慈見背余才六歲耳繼母裴孺
人以家務不遑顧而婢之提攜愈謹也猶憶其下衣
當膝處多補綴皆余所踏穿者雖極困憊亦未嘗有
怨恚色余或寒暑失調卽旁皇不寧必告知外祖母
馬宜人蓋宜人因先慈棄余早常憫其孤婢卽以宜
人之心爲心也先大人嘗稱之曰此婢若爲男子必
以忠義著年及笄遭甲申兵變余家避亂北山婢以

無人守舍輒力任之不可強遂聽之焉九月一日賊自北敗歸大肆殺掠山中聞信先大人卽嘆曰此婢休矣逾數日視之廬舍依然而婢已不復見訪之隣人或言其罵賊而奔血流被面繼得其屍於西隣王氏井中已經數日顏色如生時禍亂方離驚鴻未定權瘞城東園中嗚呼大亂之時闔城男女慘殺者難更僕數然其間偷生苟免保全軀命者未嘗無人葉葉一婢女耳何知大義苟其委頓藏匿未必遂至殞生乃視死如歸寧爲玉碎決不瓦全直與井底寒泉

同其凜冽此豈尋常巾幘中所易得者哉余嘉其節
烈久欲招魂改葬豎碑以誌其事乃數十年來偃蹇
名場又或寄迹異地於先大人在時未嘗訪知埋櫬
之處今余老矣使令其幽芳勁節湮沒不聞於心終
屬歉然因述其死節始末勒爲小傳藏之於家以俟
有心者之採擇云

焦公生祠記

翰林

田嘉穀

澤州人

寧夏焦公治稷嚴而民畏之去之日相率爲祠祀而
祝之不啻與人欲嗣僑大夫然昔僑之相鄭釋寬用

猛至稽其語子太叔則云爲政用寬難其次莫若猛
火烈人避之水懦人溺之夫子曰古之遺愛也夫稷
地瘠民力穡輕商賈歲賦所征輒取之於新粟竟有
鬻斗粟而不博數文錢者無已則請貸豪富而子母
之錢至鬻妻折子公廉其狀約以三時輸夏征十之
三秋輸十之三冬徂報完以爲例且刻限均輸納不
令刁抗者得計其輸納俱聽花戶自封額外無羨金
監收者不得干以故百姓擁治門而爭輸摩肩錯趾
轟轟聲若雷行者停車嘆以曾未覩也往稷有敝俗

締黨健訟兩造之金矢不可得率聽命於猾胥訟不能直而家已蕩甚至解衣連騎鷹犬食人鄉之人畏若虎焉公取其好訟者曉之可以自平者聽之必欲結者令訟者各署牒以攝兩造片言剖析有若神明無情者朴而釋之一錢不贖也向之諸猾橫者不復與其事率歛跡去鄉人婦有經年不見青衣虎視者矣歲在龍蛇稷大祲公泣下沾襟集父老謀救荒之策分數十廠煮粥存活以萬計舊稷學宮自明倫堂後坑陷尊經一閣化爲塵土公爲築土二丈建閣五

楹連得雋者數人公治嚴而行方賦材敏穎智慮精
審民到於今受其賜卽謂古遺愛不讓焉向令公治
不嚴以致黷而生亂是驕穆民而益之敗也誰其思
之而誰其祀之公諱浴字儼盤寧夏人以明經擢令
穆山陞潞安府同知

采蘭社序

縣令

姚延啓

烏程人

穆邑去郡將二百里前臨汾流後倚藐姑谿徑紆折
行者盤桓而入幾不知有邑城也民恃稼穡以田礲
土瘠壤賦僅居中下其俗尚殊簡質不好華縟則淫

巧侈靡之習無從而入民風猶爲近古邑雖貧尙稱
易治余性不喜飾而生平才力又無可爲濟飾之具
者庶幾以拙自安則不惟稷之士風似余卽稷之山
川陵谷其澹朴夷遠之致亦大率似余也故令稷兩
載猶若不自知爲稷之令者每晨起裁決不刻餘事
畢錢穀訟獄付之里甲不煩追呼而閭無逋課案無
畱牘政清刑簡時和年豐與二三父老鼓哺而歌帝
力可矣勸農墾荒稍稍已有成効獨子弟之秀者尙
狃於樸邀無親師取友之助以開發其智慧孤陋寡

聞實惄惄焉至稷之始進多士而祝之曰古之名公卿有戴經荷鋤者皆起自田間力學不輟卒成耑門名家諸君子並澤莪之選也玉而礪諸金而錯諸忝一日之雅謬推社祭酒以爲諸君子先多士唯唯於是采蘭之會少長畢集童弗抱研而至每月一課以十題爲率不中程者罰執經送難者趾相錯也諸生類貧窶不能多致新書或醵錢購得一房牘卽持以示余余爲甲乙而標識之諸生傳爲抄誦故其文近多新藻幽香襲人若蘭馨蕙馥者皆經余所品題而

月旦幾幾乎問字之屢晨滿戶外篝燈之讀夕徧國中矣稷旣可以無事余又不喜使之有事一庭寂然門可羅雀止以醇樸導民以風雅造士稷之編民幾乎忘邑之有令也其爲士者謬相親愛以余爲里塾之師藹然先生弟子之誼則又幾幾乎忘余之爲令也余旣自梓其文以示諸君子而又重念稷士之社若其腹笥筆采光芒百變而歸諸醇雅有典謨之遺軌焉余藉手是文稍浣俗吏之誚有榮施矣是刻也邑孝廉鄭君領袖壇坫其制作名世自當不脛而

走四方亟登之篇首以爲國書增重學博閭君反覆
讐訂殫厥苦心共得文如千首文致固自不一要皆
披華見質不屑爲浮靡淫巧之習此稷之人文所以
犁然近古而余以邑令陶泳其間左縈而右拂之亦
猶夫行古之道云爾

姚公去思碑記

縣令

畢際有

淄川人

公之蒞茲土也僉謂經營慘淡具有苦心稷之人食
其福矣而余以爲稷之福余之大幸也曷言之前者
任勞後者任逸盤根錯節擘劃盡致公何其勞高山

仰止景行行止余何其逸也余旣以公享其逸稷人
士思公者欲立石乞言垂久余方將揚扅前徽又何
可辭嘗觀西漢多循良而稱去後思者惟汜鄉何武
武在漢吏中摘發不及廣漢治辦不如敞所居無赫
赫名當其旣久摘發治辦者皆與其人俱往而武獨
見思蓋人無不可以媚獨不能以心媚人人無不可
要人獨不能要人以其思稽公善政如撫流亡安反
側清審編平徵收建魁樓立蘭社文運丕新遂有捷
南宮者至於表姚貞女之閭式景廣文之廬物色梁

生珙之德行文章種種美意不可枚舉然大畧才生於誠謨出於靜苦心本成曠懷多方行以無事故稷人士於公始至歡然道之已習而安之旣去而悵然思之浸久未艾也由是以觀要耶媚耶且今吏道之雜也久矣彼惟名譽是先故庭中稱治野則否上官稱賢民則否當官稱惠去則否公何去畱無殊致始終靡異情非公能使人思而公不能使人不思也赫赫奚足爲史稱何武仁厚當其爲郡吏識者以爲宰相器公自令而給諫皆與武合而其器深廣萬頃不

撓亦復似之蓋士必安凝如山渟泓如淵然後得以
享盛名而載重任如公者真其人哉先是稷賦額經
亂舛謬公給諫後上章釐正皆報可公不靳澤於去
後稷安得忘德於從前於是紳衿倡之兆民起而和
之者千百數非公深仁烏能致此余對之不無形穢
之嘆云公諱延啓字敬輿浙江烏程之世家登順治
丁亥進士初任縣尹擢工科給事中

重建奎樓記

教授鄭恂邑人

文廟前折東數武級而升雉堞爲奎樓憑高眺遠形

家謂有所翕納爲斯文佑其來舊矣歷年所浸圯一朝傾塌學博劉君對之惻然乞靈邑侯爲光復舉維時雪川姚侯方任事育才興文畱心頻壁遂得請相與程期計費庀材鳩工爰勅衿長者碩爲之董勸凡閱六月而落成崇基傑構跂如翬如復巋然卓樓城端夫物之成毀有時而成者由人事之興廢在人而興者因時藉令樓刼難不當此時與當此時而不當姚劉兩公之經始諸賢之贊襄况也永嘆嗟何及矣今毀輒成之廢輒興之以云人與時會時至事起者

非乎得革爲景新之象營定叶允臧之謨奎光映射
遙岑浩流秀氣成采如在簷楹顧諟間宜乎乘風氣
之先者騰踏天衢際運會之盛者絡繹皇路雲蒸霞
變景靈攸啓不其大文章之觀增廟貌之勝也耶劉
君屬予文勒石子謏陋安所謂雕龍也者謹直疏日
月並任事姓名如後然則兩公之時之人何如也
五里舖創建石橋記
年家修建遍邑域而倩不佞爲慫慂予或不知知靡
不與有明軒趙居士者每輒從事居士蓋樂施好善

人也一日詣予言橋梁眼見功德向嘗爲橋於龍王
溝矣又嘗爲橋於澗東矣徒者負者騎者輿者莫不
往來履坦有夷之行已維邑東五里鋪其衝繁淤陷
不減二橋之棘急而不彗不割失此罔恤謂利濟何
將接壘爲梁二所是其夙志且追溯其先志所未逮
而畱詒以望若逮之者顧予嘗過五里鋪緊逼汾流
一徑仄曲稷徂絳孔道也馬壁峪別派暨晉家峪下
流俱滙汾每霖潦暴漲汾流北嚙二水南奔川怒以
溢洫霍無歲無之行者悲望洋蔥厲涉焉居士之發

心橋功有以哉頃之橋成徒者負者騎且輿者亦猶
前之履坦夷行也工謀計者蔑或計之疎樂施予者
鮮不給之施居士誠好善樂施者乎時邑令孟侯方
以勸旌賢善爲務廉居士行協輿論具白二千石二
千石嘉之檄顏其門一鄉善士邑及學校亦匾旌如
府於是學博邑丞幕以及薦紳衿者若干人咸式廬
賀居士曰若者之善以性也茲橋功也能承先也能
使流俗競勸而慕義無窮也是可以風隨有稱觴者
有繪其狀者有題詩揄揚者盛名烏弈爲善之榮一

至此予都休哉居士子諸生連城貴重必亢若宗以
符善應裕後光前詎不亶然居士慮橋工費浩乞予
言行募未幾罷霜炎拮据獨立維艱寃以有成也當
今之世如居士者可多得與居士諱某號明軒橋當
馬壁峪流一晉家峪流一伐石累砌匝以石欄於某
年某月考落予故特表而出之以見公之樂施好善
此其一端云

建文昌閣記

鄭樂恂

予讀史記天官書斗爲帝車運於中央臨制四鄉斗

魁戴匡六星曰文昌宮初未有神主之也迨梓潼降
乩七十二化修悖予奪始有文昌帝君之名神主之
矣抑未有陰陽向背聳貴據秀之說也乃堪輿家奉
此爲玉律金科而儒者復舛絕不道然楚邱之什望
景觀卜又胡以稱焉緬稷先葉珥貂乘軒者絡繹如
雲而官不中丞富不萬石當時已爲風氣咎於今搏
空之翮六月息者浸五六年所而一發其爲風氣何
如孟公令稷四載德被政成課人文覽方輿遴稷之
所以盛而之衰與其所以衰而之盛而屬意於風氣

蓋公固天地人之學堪輿其緒餘也因晉庠士借箸
焉僉謀以真武廟青龍閣貲爲主費紳衿捐輸以佐
不足迄勿令絲粒費閭左擇多士幹辦清操者何星
監裴金章張煊然鄭有章鄭惺裴宸翰劉衍漢梁廷
撰何其古馬胤秀薛餘慶史灼史炤董其役於是度
邑之巽築臺三十六尺週以短垣類戴匡星宮位矣
構層樓其上祀文昌梓潼帝君神居奠矣巽峰峻起
涵照頻宮貴秀峙矣不寧惟是蘆泉一線南引散潦
公捐廉俸市地穿渠陂而注之臺側滿則洩流匯碧

水入汾水法尤詳矣肇某年某月至某年月考落爰
命七社撾鼓賽神如春社狀社人曉然於天章作人
之舉率作興事之勤編言颺祝相繼並進雖聲情俚
野要以據其中所誠然顧公謙冲若谷功成不尸且
謂諸士之相與以有成也夫物必慮遠而後見締造
之良事必返觀而始知嘉賴之大稷之先緊獨無人
而日中失時操刀失利其無益等公值姤復之交蠱
靈發之氣鼓奮庸之勞燭微先物細大不遺虛已博
稽衆思畢集以故精神所至丞幕將之校官繼之十

三士欣欣應之至勞怨罔避寒暑罔間卒俾官不費
貲民不病役以獲竣茲役也居今觀昔曠世希覲哉
嘗相與涉其上崛岉青雲下臨無地吁可畏乎其駭
人也瓊璫鴻紛豐麗博敞洞轆轤乎其無垠也若乃
彫彩之飾閃爍變幻所謂霞駁雲蔚皓壁晞曜似月
照丹柱歛赭而電熒者非歟已而周視環覽稷峰擁
翠藐岑送青左則大河澎湃攜汾流以南下右則大
行巖窠迤霍嶽而北來壯觀乎孰非文星映攝爲吾
稷之奇勝乎當考落初邑無大小從公於邁予侍公

燕適丙午省元安邑王君寬觀與斯會酒酣濡頴屬
聯散珠橫錦工麗驚座一時標致不殊風送滕王夫
非始事之明瑞而方來之慶徵也耶異日者地效其
靈天翊其運人蔚其文乾坤交泰而氤氲嘉祥徵顯
而豫作冠珮蟬聯人文麟炳非惟美姬疇昔行且光
倍疇昔矣公不尸功功誰屬哉公五袴羔裘可紀者
多此其一耳敷時繹思請以今日之文臺作他年之
峴山也可

告龍王禱雨疏

縣令 顧涑初 歸安人

伏以民惟邦本休戚關造化之權食爲民天雨暘望
均調之澤念此瓞瓞黎庶止是閔閔田疇顧以耔以
耔勤勞雖藉乎人力而旣庭旣碩滋培尤仰夫神功
從未有膏澤未施而茨梁在望者也茲蓋伏遇龍王
之神掌四海之洪波司九天之靈雨隆恩默被澤流
爲庶土攸關大造宏施呼吸亦斯民咸賴卽惟稷邑
久庇神威兆姓之感德靡涯千載之薦馨有自茲者
時當夏仲辰值天中麥穗將成尙冀西疇之滋息豆
禾欲遂正祈南陌之霑濡爾廼陽亢連旬空令望霓

有願土膏莫治試問離畢何期兼之河絕渠流孰與
澹川而漑且也井枯泉眼誰堪汲澤而耕耒耜空懸
倉箱已罄四境皇皇而無告一心惄惄以增憂洊初
奉

命今朝來守此土軫懷民困俯首自維或因政拙催
科而天昭責譴抑以恩虛撫字而歲際灾氛負疚良
多抱慙實甚然藐茲下吏雖以不職罹凶嗟彼小民
其又何辜受患敬於某月日拜手藝香步壇虔告敢
干神力卽賜洪恩伏願沛長江之寸水分巨海之一

波遙望姑射峰頭懸泉百尺竚看汾河水面鼓浪千層庶幾百畝之有秋會見三農之共慶謹據下悃仰
竇神聰伏希鑒察卽候施行

再告城隍禱雨文

顧涑初

竊惟天之愛養斯民也明則責之司牧幽則寄之神明凡以愛養斯民之術司牧力行不周者藉有神明爲維持而默相之故四境之內苟或田野不闢耕作不勤獄訟日繁盜賊滋起此司牧之過也涑初所以不得而辭其責也若夫四境之內田野闢矣耕作勤

矣刑獄省而烽烟靖矣一旦風雨不時陰陽失節以致年歲不登民人離落此則非司牧之過而神之過也茲者歲在午夏穰者麥榮者豆斯時也正靈雨望零禾稼待納之期也乃膏澤靳施者已月有旬餘矣涖初自念奉

朝廷命來牧茲土與有愛養斯民之責其能不爲之呼籲請命故前於朔之五日已草疏上聞方謂神其愛我民養我民思維持而默相我民必且軫念輿情立施膏澤而優渥霑足之休可旦夕而至也乃怒焉

待命者迄今又越有十餘日矣千畝之枯槁依然百姓之憂虞如故曾未邀涓滴之賜而一爲我民解焦渴焉豈神鑒幽茫而莫覩斯民之皇皇望救耶豈天聽高高而下土之阡危神力其莫可誰何耶亦豈稷民當罹此凶灾而數之無可逃者耶抑豈神之威靈欲罪此一方而置灾患於若罔聞知耶嗚呼神其無知耶其有知耶以爲無知則赫赫嚴威儼然享茲土之薦馨而福善禍淫者非神耶以爲有知則安有守此土職此民覩百姓之憂危若是而宴然不爲之動

念也耶今使爲司牧者任其職而不盡其事百姓有
患而不知四境就荒而莫理其待之當何如也則均
有愛養斯民之責者夫誰得而寬其咎乎涑初今者
齋戒徒行再申雩禱與神期三日內務使膏霖遍潤
甘澤滂沱庶幾惠我田疇以慰殘黎之懸望不然將
涑初無以更撫茲民土恐明神亦何以長享此廟祀
哉爲此佈詞再懇神其鑒之

重修儒學泮渠記

邑令

錢源龍

奉賢人

稷邑學宮櫺星門內舊有泮池引城北葫蘆泉邇迤

流入故渠淹塞涸二十餘年矣予蒞稷之三年乙亥四月邑諸生請於予謀疏之予曰是宜急舉也爰捐俸金畚鍤循渠故道掘二尺許蜿蜒盤曲水汨汨至不一日而泮池泓然可鑑顧渠長四百五十步穿巷陌經衙署壘土兩傍雨衝易塌而市廛堆積之區闕塞尤易謀以磚甃之土覆其上可圖永久簿書旁午未竟厥工今丁丑二月邑好義士願捐貲任其役而諸生之董事者必公必勤鳩工二十日磚甃完固於是泮水洋洋可無立涸之虞實學校文瀾之助也夫

修舉廢墜宰是土者之職卽大工役不足書士民好義急公有俾學校不可不書以垂後好義者何監生段克猷子生員寅董是役者廩生王喆黃璿劉登瀛閭有光而司出納之生員賀其年亦得附書焉

思文書院碑記

邑令 韋之瑗樂會人

書院之設始自元和間李渤厥後有白鹿嶽麓睢陽嵩陽四大書院其名乃益著維時師儒道重化導訓迪之方皆出自當世大賢其所以鼓舞之成就之者胥與學校相表裏要無不以正人心變風俗爲汲汲

其規則具在誠可取法也今

聖天子在上文治炳蔚禮樂之化淪浹日深自省會

及郡邑莫不有學卽莫不有書院凡有司牧之責者

亦各體養必兼教之意隨所在而造就之譽髦濟濟

翕然向風可知爲其事未嘗無其效此三代以來之

所以敦崇學校也稷山舊有義學在縣治之東南隅

乃明時太守公廨爲邑長天爵朱公所改築者也其

中規模雖具而堂宇迫隘門楹垣墉亦漸就頽敗且

因經費無出本爲擁臯比聚絃誦之所而閒棄之以

長草萊良可慨也予於紳士晉謁之次謀復此舉僉
躍然樂從且曰經始固難而善後爲尤難曷若醵金
權子母庶幾歲有定額官司主之出入共之自可經
理於勿替倘繼是以圖更屬裒益有基雖賈洪之三
開學舍無以過此矣予謝不敏而深韙其言乃親履
其地周遭營度移其向背而更之爽塏焉增構講堂
樓亭若干楹齋舍庖湍畢具樹坊懸額易義學爲書
院顏曰思文時諸紳士爭先樂輸共得若干金計所
經費以其羨餘旋交質庫歲納息以助脩脯之資爰

乃延聘名師擇俊秀之士羣處而肄業焉孔子曰十
室之邑必有忠信又曰君子學道則愛人通其意以
立教何莫非守土之責歟吾固知其爭自濯磨相觀
益善異時必有學優行茂蔚爲國華者則誠斯邑之
光也夫子故嘉邑人之急公慕義並欲永圖經久爰
勒石記其顛末並書刊捐貲姓氏於碑陰庶後之覽
者有可考焉

重修廟學記

韋之瑗

國家偏天下鄆邑建學而立之廟所以崇聖人之道

也聖人之道其大綱在明新止至善其節目在格致誠正修齊治平自天子至於庶人合上下而一致者也則生聖人之後而崇聖人之道者豈以有位無位而有異乎昔范文正公蘇州人也以其所得南園勝地爲蘇州府學夫蘇州分隸守土其學之得與否固有專責而文正獨舍已宅爲之何也文正做秀才時卽以天下爲已任其後功業爛然卒爲一代偉人而識者謂有宋理學實自文正啓之蓋治天下以得賢才正風俗爲本而賢才恒出於學校文正爲賢才計

卽不得不爲學校計施宅其細事耳然其崇聖人之
道以育賢才而厚風俗卽此亦足徵矣雖然南園之
勝舍之而其名常在視平泉佳麗一時艷之久而湮
沒無傳焉文正之與文饒其度量相去何如哉辛巳
孟夏予奉

命來宰稷土始至謁廟見大殿兩廡煥然新矣凝然
固矣而殿廡以下甃砌丹塗次第修舉詢庀材鳩工
之直則曰此署篆甘君與署教諭李君訓導張君之
經營而邑人段生父子傾貲以供其用者也予聞而

義之竊以稷邑無巨富段生之富又非甲於稷者曩
嘗獨修泮渠芹藻增香矣教諭趙君卒於官貧不能
歸爲出多金以助之今又欣然建此非知崇聖人之
道者歟茲舉也其心卽不私南園之心也擴而充之
雖格致誠正修齊治平之道胥始諸此區區小善片
長又不足爲段生限矣段生其勉乎哉是役始於仲
春考於孟夏予合僚屬諸生以落之不可不鐫石以
告來者甘君諱延年陝西平番選貢署教諭事李君
諱竹苞平定歲貢訓導張君諱成基洪洞歲貢段生

名克猷子寅由附生貢太學共謀始者生員閭有光
閻德光薛孟春等督工則生員賀其年甯照離鄉耆
薛上達王繼商例得備書

王曰祿新開馬壁峪山徑記

州判

李友洙

海寧人

辛巳歲余攝太平篆以公事至鄉寧山徑嶽崎往往
窘步歸返絳道出馬壁峪此卽鄉寧稷山二邑接壤
處也迤邐十餘里左右皆懸崖峻阪深壑危流而一
徑中通甚坦夷可怒馬馳騁余竊心喜焉而未知爲
誰之力也癸未冬余攝吉郡數取道於此見石碣屹

立諦視之始知爲稷山王生曰祿開鑿耆老告余云
此路向稱阨塞人跡罕至自曰祿去險就夷遂成坦
道不特居民採樵跬步無虞卽行旅之往來亦皆安
驅循軌而昔時所謂巉巖灌莽者一變爲冠蓋絡繹
之衝微夫人之力不至此余聞而義之夫匹夫爲善
于鄉雖事屬細微亦當錄之以爲風俗勸矧曰祿鑿
山通道利我行人其功蓋尤溥哉卽此推之則曰祿
生平好義更可想其大略矣余雖未見曰祿而有善
必揚亦官斯上者之責也爰爲之記

重修文廟碑記

教諭

武錫九

交城人

承思文陳常之舊守魏俗勤儉之風其禮教信義未盡泯也根本固矣而姑射峙於北汾水遶其南屏以土岡磅礴而鬱積地勢之盛又如此生其間者澤躬爾雅明體達用如邑先達之文章事功永綿於勿替豈不甚盛廼求之而未嘗見也且非獨不獲見此卽邑之科目亦屬寥寥豈山川之靈淑有時而或息與抑或古聖王教澤之遺與習俗之厚流及旣衰與而皆不任受也夫風俗成於人心人心定於所向忠信

廉節伊誰弗好無以動之相狃於積習而安之矣而
感人心以易風俗則斷自學校始

國家道一風同郡邑州縣罔弗立學設官以董率之
凡以人心之危微胥係乎此也稷之學宮不蔽風雨
歷有年所余下車卽不自安與余友香谷褚司訓有
臭味焉而明府洪公深知大體首捐廉俸爲一邑倡
同學諸君子踴躍爭先又有解馬羅高諸同人經營
區畫費少而功多於是兩廡戟門以及前之圍牆歲
歷四載煥然一新是舉也豈特重祀典肅觀瞻已哉

蓋將培植其本根而振作其志氣使知人克傑而地
乃靈然後觀之於釋菜以悟夫禮樂器數之遺觀之
於飲射以習夫揖讓謙遜之節約之於

聖諭廣訓以砥其廉隅而養其德性則立教有地向
道有方庶幾人才日出以上繼夫諸前輩道德勳名
之盛而處則爲名儒出則爲名臣樂觀德化之成山
川靈秀之氣今何必異於古所云也行卽以今日之
振興卜之也諸君子各啟乃心毋安故習以深副余
望焉是則區區之心也夫

重修杜工部讀書臺記

知縣

張應辰

臨汝人

丙子中春予因公赴小杜村東臯崖畔翼然有亭傳
爲少陵先生讀書臺憑臨矚目林木蔚然棟宇猶舊
碑碣無存考公年譜雖芳躅遍寰區惟三晉不概見
然誦公集有憶昔北訪小有洞洪河怒濤過輕舸懷
韋大夫之晉悽愴郇瑕邑差池弱冠年丈人叨禮數
文律早周旋韋杜本稱尺五其奉韋爲先進髫齡嗜
學早卓犖爲河東之遊其明徵也今郇瑕去稷咫尺
想訪古故絳流盼高京琴書暫憩嘯歌寄情故老之

傳聞亦安可盡非耶時余網羅散軼編緝縣史矧此
名蹟允足爲山城生色遂欣然採入流寓以補年譜
所未及尤復構而新之題爲杜陵書院所以述先賢
名來學也並誌之以詩

勝蹟邨名杜文星舊暫栖亭高錦里宅樹壓浣花溪
碧蠹遺牆字冥鴻印雪泥青山磨片石惟我有留題

重建稷王廟碑記

邑侯

李景椿

松阿

蓋聞有非常之功必享非常之報故從古先聖哲王
凡有功於天下後世者類無不崇祠廟隆豆登以光

祀典然稱是以求而功之大者孰有大於開萬世粒食之原如帝堯所舉農師粵后稷者乎當是時黎民阻饑爰命后稷播時百穀稷邑爲古教稼地卽后稷發迹之所距縣南五十里舊建稷王廟於層峰之上累朝尊奉久矣明初太常定甲以夏四月十七日命有司肅禮致祭厯代因之甚盛典也顧道遠則跋涉維艱邑人士咸以供億爲苦嗣於縣治城中建立廟宇所以崇盛德報大功蓋厯有年所矣居無何道光丙申夏廟之正殿倏遭回祿而畫棟雕欄化爲灰燼

神靈幾無所憑依矣庚子冬余忝蒞斯土甫下車謁廟瞻拜見殿臺宛然而神靈失所慨然興重建之志時以民事初膺簿書旁午未暇也越癸卯歲民安物阜百廢漸興乃進紳耆人等而諭之曰惟茲稷邑教稼伊始烝民乃粒厥功不忘也大德配天斯廟不可

緩也適邑之紳耆

監生

王灼

醫士

梁天棟

監生

高向葵亦具

稟前來籲請重建以爲斯邑光且曰闔邑士民世世代代食稷王之德遠矣其敢忘稷王之功乎雖工程浩大惟冀邑侯倡義捐修灼等亦廣爲募化庶集腋

成裘在此舉也惟時衆志既定詢謀僉同余與同城
兩學暨城守捕尹諸君亦各量分清俸爲士民先而
闔邑人等靡不欣然共解囊金輸將踴躍並隣邑外
省亦皆聞風鼓舞好義捐貲不數月間共得若干金
而經費於是大備已而命王灼梁天棟高向葵等力
董其事構異材選良工精陶殖運石土結構經營舉
舊基之狹者廣之低者昂之而殿宇較前宏敞焉其
殿前則建享亭以伸崇報東西隅則起兩樓以懸鐘
鼓後殿暨兩廊亦舊者重新缺者增補經始於歲癸

卯夏越乙巳歲工始告成觀於烏草輦飛龍翔鳳翥
雲霞燦爛金碧輝煌見之者孰不羨曰此斯邑之大
觀乎而不知此非徒壯觀瞻云爾也所以妥侑神靈
者在此也所以報稷王非常之功者亦在此也從此
對越在天降爾遐福明昭上帝迄用康年共蒙神庥
詎有極歟工竣稷邑人士列壯請記余深喜稷人士
不忘稷之有功於民也且喜稷人士能報稷之功而
知樂利之所貽者遠不憚竭力以共襄盛事也因歷
敘始末勒諸貞珉其他好善樂施並督工姓氏例得

備書以垂不朽云

重修學廟記

從來世運之盛衰驗諸風俗而風俗之淳薄積於人心究厥本源則皆以學術之邪正爲之樞此以知學校之所關匪細而明倫勸學之地隨時修舉以振刷乎士氣者誠守土者之先務也前邑侯黃公治稷善政故老至今能言之而以余所聞則修理學宮一事尤爲得其樞要先是廟之正殿牆多剝落泮水故渠亦復久廢而櫺星門崇聖祠文昌宮傾圯尤甚公首

先捐俸以爲邑人倡而邑之人士亦能仰體公志不吝捐輸工貲旣集工事遂興於是剝者堊之廢者復之傾者易而新之諸工以次告竣未及落成而公已移疾去至今未登貞珉諸紳士終以爲憾因謀勒石而請余爲之記余惟公之爲是者謂爲一時之豪舉徒以飾吏治而崇美觀乎抑所望於稷人士者固別有深意存也慨自正學旣廢辭章利達之病中於人心而風俗因之不長厚也知非一日之故矣士自束髮受書以來父兄之所期師友之所勉舉不出乎辭

章利達之外甚矣其弊也公思有以救之而因寓其
意於明倫勸學之地謂入廟思敬或者睹廟貌之聿
新而慨然於聖賢之所以俎豆千古者非以權重非
以勢尊獨以其道耳是道也命於天具於性固人人
所可能人人所可知非甚高深而阻人以攀躋之途
也誠使遇親思孝遇兄思敬凡道之著於倫物者靡
不反於心以明其理體於身以履其事行焉而著習
焉而察久之而理與事融卽身與道併自將有手舞
足蹈之機彼辭章利達之積習問能入此時之胸臆

而奪其志者乎而由是因已之所知轉憫夫人之不知而啟牖之情切因已之所能轉憫夫人之不能而扶掖之志殷始於一二人漸且及於千萬人則學術端而人心以正風俗以醇是則公所爲修治學宮之意亦卽記公修治學宮之意也不然徒竟夫廟貌之巍煥而僅以袞衣博帶入乎其中謂是聖人之徒也吾恐言堯之言而行桀之行服舜之服而心蹠之心雖年年鳩工日日庀材究於人心風俗豪無所補又何怪以俎豆爲匏瓜無聞縫掖者目儒爲賤而欲斥

而遠之哉吾固知公之所爲者其意在彼不在此稷
人士其不河漢余言則人心風俗終有賴焉而公之
功且將與姑射並高汾澮同長也公姓黃諱仁江蘇
婁縣舉人道光辛巳歲任監工者廩生王如泗薛之
彥王兆烈杜凌霄生員羅振基張受祺馬錦章武生
李思亨也教諭長平司百川撰文

創建考院碑文

邑侯

王治成

雲閣

自古稱善地者必美風俗而培民風者莫先士習此
學校之外更設考院教育之而俊秀之升則由縣府

以送院考而登士林是亦命鄉論秀之遺意州縣之
所以皆有考院也戊申春余宰稷山接篆後暫居思
文書院屋宇整潔而闐寂無人詰其由以無膏火故
初不知廢自何年廢自何人噫可慨矣蒞事後每於
紳士接見議復興之紳士莫不稱善是年冬科試文
童七百餘人具衣冠而來卽在堂前露坐防閑已屬
難周偶遇風雨直無藏身之所其何以隆體統而重
典章因謀諸紳士僉云考院書院皆屬要圖然書院
現在所欠者經費耳考院創修必需時日宜勸捐以

修考院卽以修考院之餘貲爲書院之經費一舉並興豈不甚善於是以余先倡捐廉五百金卽付紳士董其事衆紳家富室亦皆踴躍樂輸兼按村中民戶量力而勸捐共得金四千餘兩東門內路北舊有講堂基地狹小不敷用又於西鄰楊姓間基議價置買合計之度堂度室而外兩廡文場可容千餘人焉爰乃構磚儲石鳩工庀材而督監之紳士出入分明絲毫不至妄費總未假吏胥之手致滋弊端於己酉十月興工庚戌六月告竣共需金三千三百兩有餘考

院成而人文宜丕振矣至始終會計捐貲並修泮渠
學宮雖有餘剩已屬無多暫歸書院生息利銀除歲
修外僅可作爲獎賞脩金膏火無出余仍捐廉延師
課試然此總可暫不可久異日必將書院經費籌備
全善方與考院之作育人材相濟有成且爲學校之
一助云督工紳士按知事馬錦章署朔州學正姚鴻
漸己酉科舉人杜若椿廩生張世昌監生王灼醫士
梁天棟生員楊渤原任赤峰縣縣丞杜凌霄歲貢生
王兆烈從九杜凌漢廩生閻步岳己亥科舉人賈步

沼首事生員李思學生員季寅例得并書

重修思文書院記

邑侯

沈鳳翔

笠樵

思文書院者前稷山令韋公所改建者也歷年旣以漸就傾圯至咸豐六年一燼於火益廢不可居予自己未春承乏以來雖延師課士未嘗稍見然覩皋比徒於他所生徒之肄業者不得朝夕聚廬而講學焉心竊惜之蓋興復之念蓄於予懷者久矣今年春乃謀諸衆衆稱善先是稷之好義者議輸金修舉已註籍矣以費不貲而止今按之共若干金估直將半焉

質諸其人咸請如議予遂倡僚屬力任其餘而擇稷
紳之廉且勤者俾董其役經費出入悉主之經始於
今春之二月至六月工成堂室亭樓一切並仍其舊
而垣墉之築之固楹杙之材之良丹漆之飾之華視
昔有加於是巍巍然翼翼然向之廢不可居者今復
爲道藝之府著作之庭夫書院之設非徒以博虛名
也必將萃一邑之學士文人講貫其中使之涵育薰
陶日進於善而不能自己由是嚴之於義利之辨以
端其趨向精之於體用之合以大其攜持處不讀迂

腐之書出不爲苟且之治行見蜚聲騰實激濁揚清
摘詞則高文典冊潤色昇平立身則取義成仁無慚
忠孝斯惟

國家養士之意予竊於斯有厚望焉雖然韋公之始建也
嘗有意於善後矣至其所謂質庫納息以助修脯者
今已無存焉予旣求其故而不得將謀其新而民力
有未逮也是則予之有歉於韋公而不能不俟諸異
日者已督工紳士生員李思學興國州州判吳福堂
朔平府訓導姚鴻漸署臨晉教諭馬大椿恩貢生閻

步岳歲貢生張世昌河州州判閻萬清己未副貢生
閻廷獻例得備書

思文會敬惜字紙序

粵稽一畫開天六書宗聖龜馬而肇圖讖犧象以啟
文明自治易乎結繩爰寶傳夫祕笈雖殊途梵佉莫
偕蒼頡以俱傳而福地鄉媛競護紫文以俱古是以
帝王謨典十六字普衍精傳朝序科條三千律遍垂
文法會聞鬼哭寄苞苴於玉蘭金泥賴有神靈聆絲
竹於壤垣破壁菁華斯在球壁同珍不特黃卷文人

熟探二酉抑且蒼頭監子爭識一丁以至刀筆鈔胥
不廢從公之牘舟車販負勤留記事之珠披籙黃冠
雲籤香護誦經緇袖貝葉書繙莫不倚此金科奉爲
圭臬千金隻字豈屬虛談半粟一絲等茲寶惜乃者
人心不古薄俗無知黑孽彌天青文棄地鸚零陌路
幾如墮溷之花狼藉泥沙有類隨風之絮不惜蠅營
夫故紙圖利息於還魂爲留駒隙於明牕賴彌縫以
補罅摧殘凌襍拉搭鬢髮固不特裏物燃烟裂牋拭
穢凡諸罪譴悉召眚災已夫惜於無字之先者士人

之筆墨宜慎也惜於有字之後者大衆之珍護宜勤也余等爲惜零星共謀未雨經足踐而未忍各手拾以奚勞亟宜命彼筐人撿零落於破瓦頽垣之側互相募化廣搜羅於公門書館之中碧騰餘焰之光投諸大冶紅熄已灰之燼送彼清流重價以廣招徠則廢紙之弊端自絕歷時以經久遠則褻字之澆俗漸除惟是獨力難支衆擎易舉所望同心善士共登大願之船有志斯文如入無遮之會或量力而輸赤仄輕亦何妨或慷慨而助朱提多尤益善行見永消孽

障上迂 天和不得罪於聖賢結善緣於文字王沂
公子登鼎甲拾字之福報可徵楊全善世掇巍科埋
字之前程共驗大羅天上共證心果以聯班千佛經
中請署頭銜而秉筆是爲序

告城隍捕狼文

竊以鋤暴安良乃守土之責備禦災捍患實神職之
專司 下官 承乏茲邦及今三載勤求民隱雖無善政
之及人抑荷

神靈差信潔清之在已乃苛政曾無猛虎而奇災竟致

貪狼昨聞桐上等處地方結隊成羣繡壤皆其蹄跡
弱肉強食赤子任其吞噬事屬創聞咎將安在雖側
身補過亟宜責已以消災而燃眉在危敢不爲民而
請

命伏乞

仰祈

上帝俯拯羣黎速遣丁甲之神殲其醜類還趁庚辛之令
賜我豐亨庶內修與外攘兼行錫福共揚威並舉昭昭

冥冥各竭司牧之誠戶戶家家合受

明神之賜靖茲妖孽曷旣馨香敢瀝鄙誠
神其鑒諸尙饗

捕狼示

爲賞募捕狼以除民害事照得亞聖立言特重牛羊
之牧姬公作相必嚴虎豹之驅蓋以鋤暴乃可安良
與利必先除害此大蜡所以有迎貓之典周禮所以
有攻獸之官也本縣承乏茲鄉及今三載勤求民隱
敷暢

皇仁

細大躬親旣任勞而剔蠹潔清自矢用勵節於懸魚

幸而螟螣不傷雁鴻無恙亦旣耕鑿相忘乎

帝力雨暘屢荷夫

神庥矣頃者訪聞桐上桐下董村等處突遭狼戾擾害鳩居始猶傷稼之灾繼有噬人之患貪殘無厭爭如碩鼠之食苗襁褓何辜竟類鴟鴞之取子猛已極之擇肉慘更酷於剝膚見者莫不心傷聞者能無股慄第念瑞爲德應妖由人興是以宋均至仁郡有渡河之虎魯恭異政郊無入境之蝗每覽昔人感召之由輒深今日闕遺之懼然而彼蒼示警允宜修德以

稷災惟是保赤有方豈得養癰而貽患除本縣齋心
引咎省過彌災外合行出示曉諭爲此示仰合邑村
鎮獵戶及各邑軍民人等知悉率丁男並舉爲稚子
復仇想勇往不乏賁育之倫卽柔弱亦多智謀之士
或電其尾或跋其胡或於豐草長林而施以霹靂之
火或於平原曠野而張以天星之羅鍛乃戈矛備乃
弓矢務使牝牡盡歸囊括獫狁悉入絃中本縣急欲
除殘不吝重賞其賁狼詣縣來獻者無論生斃準照
狼數給賞計狼一頭賞錢拾仟事期必護言無或欺

本縣已默乞

神靈助之驅逐爾等勇皆可賈何弗效齊人兩狼之
驅看今番中必疊雙可想見

盛世五犯之詠狼如有知當亦斂跡於

堯天

舜日之下而相率爲騶虞麟趾之詳也特示

諭諸生

教諭

司百川

亦山

諸生留余再任意良厚但吾輩遇事須裁以義莫以
私意牽擾此意雖已面諭猶恐諸生未悉鄙懷茲特

披瀝言之余自幼溺於俗學不識正學然於古人難
進易退之節嘗羨之且欲效之憶余自十二年二月
銓選得稷例應六月到任止以時方歲試署事者未
免朶頤而余汲汲到任殊多不便故遲之似於難進
之義稍足自信到任以來漸與宦途諸公往來時覺
語言面貌又是一番景象別有一番理解自覺迂拙
之性不合時宜退而卽有歸志止以先人未沾一命
之榮此出未免無謂茲先君之誥已請六歲之期
已滿迄今不去是卽駑馬戀棧豆余所痛鄙而深惡

者謂可以身蹈之乎况自數年課讀之餘時取先儒語錄反覆叅觀此心似稍有一隙之明斷不肯負初心而忘貪昧無耻之戒也明矣夫余性自來剛褊自昔見人之依阿澳忍不識羞耻者猶耳熱面紅責備無已故朋友中時以惡惡過嚴箴之以平昔全任質性時尙知依違不決爲耻矧今頗讀古書稍知學問顧忘孔子之戒貪得而不知止乎余志決矣諸生愛余當以德愛之昔寇萊公再被召入之時嘗過其門生其生勸以此行最上當先發天書之僞其次則有

辭位而已公不能用後再相品望減於前時公深以爲悔而已不能追後人譏其見出門人下者以一念不知止也余一介寒官安敢妄援古人然尊卑雖異而出處之義要亦相同苟謂不足齒數之官其去其留於義何關是萬鐘爲義而一介非義也以便安昧苟祿之心則可稍知廉隅者斷斷不爲也且諸生卽欲余留不過爲訓迪之計世有一身昧進退之義而可以教人者乎然則余之去正所以教諸生惟兩地關心各勉其所以爲人之道則余有可以見諸生諸

生亦有可以見余者斯其爲愛也大已願共勉之

稷山縣志卷之十

藝文詩

唐

酬張九齡當塗界畱贈之作

文獻公

裴耀卿

邑人

茂先實王佐仲舉信時英
氣覩衝天發人將下榻迎
珪符肅有命江國遠徂征
九派期方越千鈞或所輕
高帆出風迥孤嶼入雲平
遄邁嗟予役離憂空自情
飭簪陪早歲接壤厠專城
曠別心彌軫宏規義轉傾
徒然限饑渴况乃諷瑤瓊

金

寄陳正叔

尚書

趙秉文

滄陽人

渺渺西風去翼輕
長林風葉動秋聲
嵩邛競秀容多
可河洛交流忌獨清
廣武山川迷故壘
成臯草木閔
空城憑高一掬英雄淚
寄與窮途阮步兵

送雷御史希顏罷官南歸

御史

陳

規

邑人

五事前陳志拂劇
屹如砥柱閱頽波
一麾共惜延年
去三黜何傷柳季和
連蹇仕途如我老
激昂衰俗在
君多扁舟南去知
難戀萬頃煙波一釣簑

過驪山

陳規

豐鎬無由問故基三章止見黍離詩而今多少華清石都與行人刻艷辭

贈陳司諫正叔

御史

雷

淵

渾源人

洗兵有志挽天河補袞剛畱諫諍坡賦出石腸還婉麗政成鐵面却中和寒侵桃李淒無色雪壓池塘恠不波急手尊前謀一醉六街塵土浣人多

寄陳正叔雷希顏

劉光謙

東南形勝古徐州人物休評第幾流落落陳雷天下

士故應連榻卧黃樓

陳子正容安堂

進士

段成已

邑人

陳子少英邁逸氣不可挫典型肖乃翁出語輒驚座
行止非所能造物聽掀簾功名鷹在韝歲月蟻旋磨
區區一邑中十載供史課結廬慕淵明志向有許大
澹墨寫形似終日相對坐一室足我容百念付慵惰
青山隱檐楹流水出其左植花數十叢種竹千百箇
事來若機張事去如旣墮浩然方寸閒不受一塵汚
豈無二仲賢閒暇日相過有酒相獻酬有詩互賡和

溪山入笑談珠玉霏咳唾徜徉天地間一物莫非我
醉來語更眞卿去我將卧主人正高枕山鳥莫啼破

題梁氏靜樂室

段成己

攘攘區中人役心名與利於身竟何有乾沒不少置
叔敬有耳孫皤皤與時異一官不肯覓閒居養高志
築室塵境中中有塵外意方其厭囂湫歸來行少暨
牀頭一卷書淨洗紛華累苟能樂其樂寧復事吾事
見客不吝情有酒卽成醉爲問東華塵何如北窓睡
清風吹我懷萬事覺無味誰知方寸間自有清涼地

吾兄同仲堅採鷺鷥藤於午芹之東溪因詠詩
見示前代詩人未嘗聞賦此者此花長於田
野籬落間人視之與草芥無異是詩一出好
事者將知所貴矣感嘆之餘敬次其韻有與
我同志繼而述之不亦懿乎 段成已

微雨灑郊垆百卉欣並育幽花發溪側間錯金珠簇
徐看是鷺藤香味濃可掬忍饑出新句大笑負此腹
遺落榛莽間采擷誰見蓄情知無俗姿安能悅衆目
先生日來往東溪路應熟一經品題餘姓字耀巖谷

遇合良有時不才異山木

呂氏用靜齋

段成已

兩岸夾嵯峨一水中委蛇是間有高人靜與山林期
結茅並溪石故跡司空遺因山愛其山佳處應自知
心間境隨勝眼靜山增竒寥寥丈室中日用夫何爲
不書咄咄事高談休休詞無人書一編有興酒數卮
便是一生了安問著與龜依依中條雲夢想紫芝眉
昨朝寄書至謂我來何時急營買山錢已覺從君遲
他年兩繩床分忍西山饑

蒲城董公余素不識其何如人也一日袖橫軸
所謂龍窩圖者同仲堅見過而以詩見謁余
雅不能文詩尤非所長加之老病日久縱不
避拙惡亦安能爲他人推肝腎邪渠請益堅
余重違封意且念其勤苦姑因所見以叙之
云爾

段成已

封生攜客來謁我蓬嵩裏軒軒亢塵俗不知誰氏子
所主我旣賢伊人亦云喜探懷出新圖一語煩舉似
蹇余不能文三請意未已溪山有素期入眼盡其美

層雲蔽重淵萬木夾兩溪飛流瀉絕壑千丈垂幅紙
餘霏散如霧點滴亂紛委何物竅其傍相傳龍所止
廟貌寄空山何代爲經始年深祭血乾亂久誰復祀
威靈昔所聞對面隔千里誠通感必應雖遠猶在邇
巍巍窟宅尊安卧久不起何當洗甲兵倒挽幽溪水

午芹道中

段成已

渺渺江風吹葛衣愛閒長與世相違青絲步障柳千
樹碧雨屏風山四圍入眼江花如慰意近人沙鳥信
忘機虛名到此成何事一笑平生始覺非

汾水秋風

段成己

一曲劉郎發棹歌
歡聲未已耐悲何
只今回首空陳迹
依舊秋風捲素波

仙掌擎月

段成己

月出山頭未數竿
仙人掌上玉團圓
瑞光冷射三千丈
絕勝碧蓮峯下看

虞坂曉行

段成己

林外晨鷄第一聲
隴頭殘月伴人行
未知局促鹽車下
老驥蕭蕭又幾鳴

首陽晴雪

段成己

薇歌一曲對西山萬古清愁老翠巒望斷空巖人不
到光搖銀海玉峰間

贈師富卿

段成己

老大溪山入夢頻強憑圖畫寫情真歸與不及身強
健山有英靈恐笑人

雲中暮雨

段成己

古壘雲藏一徑微河山依舊昔人非貪徵往古興亡
事不覺城頭雨濕衣

乙巳清明遊青陽峽

京兆侯段克己 邑人

東山氣象太猛悍萬馬鬣鬣來楚甸中分不肯割鴻
溝鍛礪戈矛期一戰西山折北如西漢獨餘絳灌奔
而殿誰爲劉項決雌雄賴有韓彭力相援廬溝直下
兩水合泯泯暗流通一線突爲瀑布出山口流沫成
輪浪成旋前逾百步落石甕黛蓄膏渟那敢眴沈沈
南去若白虹爲嶼爲泚互隱見鑿開混沌幾千秋世
俗雖見如不見今人雖有筆如椽爲寫佳名傳寓縣
人間佳節重清明呼兒折簡招諸彦一生能著幾兩

屐佳處每欲經行遍山靈著意勸遊人吞吐烟霞生
萬變山阿玉女跪焚香巖伴仙人一笑倩居者儼若
帝王尊劒佩雍容侍閒晏植者磊落如鉅人聚立廣
廷議封禪拱者矯矯如勇夫執戈夾祀著綦弁平灘
淺瀨乍可揭溪路曲隨峰勢轉葛屨偏宜苔蘚滑行
襟時被薔薇宵當面烟嵐舞翠蛟出岫閒雲飄素練
羣行不復事拘檢眼正明時脚還倦班荆共坐溪上
石粃粒濁醪具時饌良辰無奈夕陽催飛觴正要清
歌薦醒心况復有寒泉玉池遍返成三嘯三分春色

二分休風外飛花時一片古人行樂欲及時半百之年猶掣電惟有愛山緣未斷夢寐孱顏添健羨一窮到骨不自知虛負胸中書萬卷謾向山邨老却人生來不識荊州面肝膽槎牙須酒澆顧我非狂亦非狷紛紛世無真是非棄置從渠若秋扇歸來新月偃林梢寂寞衡門掩深院

戊申四月遊禹門有感
段成已

黃河一線天上來兩山突兀屏風開天生聖人爲萬世驚濤拍案鳴春雷冷雲直上三千丈石巔古廟高

崔巍斷碑歲月不可考丹青剝落空莓苔嗟予去古
蓋已遠荒詞漫汗相驚猜安居平土果誰力愚民耳
目誠可哀一聲漁笛起何處滄州雅興還悠哉

余僑居龍門十有餘年封張二子日從余遊而
貧又甚焉因寫所懷兼簡二子共成一笑

段克己

病久慵增劇塗窮事轉迂水兼形共稿錐與地俱無
醉語勞揮塵悲歌漫叩壺鮮鮮籬下菊笑笑汝益羈孤
野步仍用韻示封張二子

段成己

散策溪頭路溪回路更迂山隨行處好人似往年無
波靜魚千里天晴春一壺龍門何限景歲晚不相孤
興上人駐錫姑射山麓他日邀余所居之靜樂
齋勉爲賦此

段克己

我愛興上人閒處先著脚雖有買山錢難尋一卽壑
向來棲息地龍象久寂寞重尋林下徑竹石若紛薄
溪水恣交流巖花自開落却掃丈室中一瓶還一盃
靜樂題其顏塵緣聊解縛寥寥千載下此理誰發藥
我今爲拈出未免一重錯有靜必有污無苦亦無樂

混沌元不死七竅剛自鑿鄭重庵中人萬法本無著
獨有太口心油然滿寥廓

元

玉詩懷古

判官王惲

我行河水幾欲徧大抵盤回山阜轉南崖高與北山
齊玉壁似根分一綫荒烟廢壘照坏土砲具梯衝經
百戰短悍盛說鄖君靈萬騎陰風想平甸一曲悲歌
勅勒川當時神武已淒然韋公守禦儘良策更著百
升飛上天乃知誣殺咸陽目卽是邕皇入鄴年

過
司
諫
墓

考試官
劉 祁

鷺坡鳥
厠舊遊空三尺孤墳野寺中猶有憂時心不
死墓門昨夜起秋風

明

姑
列
山

張昌

峨然姑_蘇初山中有玉洞仙脂膚若冰雪被服行蹠蹠

稷

御史
喻
時
人
州

飛少凌北撲征帷朔氣遙連白虎旗永急漁舡畱凍

浦山空獵網挂寒籬觀風只到羲和塚訪古還過後
稷祠間說單于侵內郡將星不見使人悲

稷山縣行臺書懷

御史

黃

中遂昌人

玉壁城孤秋寂寥稷王祠下水迢迢晴峰雲樹臨丹
壑夜塔風鈴響碧霄邊檄近憂番出戍磧田久苦倍
徵苗感時空逐羲和御獻納羞稱翊聖朝

遊清涼院同梁理夫春元任汝行憲章二昆季

薛以文秀才

叅政

毛

愷江山人

油菜花香僧院幽上方春日足夷猶偶逢勝友成良

會還喜名山愜遠遊浮世大千塵夢裏法身丈六翠
巖頭幾回欲叩無生學月自長明水自流

詠八景

御史
宋儀望

孤城遠見稷王山悵望行雲不可攀今日吾儕憐飽
食憂時空有淚如潛

稷峰疊翠

姑射仙人去不歸雲霞綽約玉爲肌朝來轉見晴光
好欲向風塵早息機

姑射晴嵐

每懷高士隱河汾絕學千年尚有聞誰識續經心獨

苦空山深鎖洞前雲

文洞飛雲

早從華嶽看仙掌更入汾陽對掌峰
試向峰頭吹玉笛梅花落盡月明中

仙掌擎月

輜車轉入稷山城城畔猶傳玉壁營
戰骨祇留荒塚在蕭蕭落水盡悲聲

玉壁秋風

汾水流漸日向西孤舟人對夕陽低
那堪夢入江南路起聽征鴻中夜啼

汾水孤舟

泉流瀰漫浸平田山色遙分草樹烟
借問清光何處是飛霜應遍早梅前

甘泉春色

寒城山色晚蒼蒼蕭瑟悲風起白陽
忽向羲和陵上

望猶疑圭測對斜陽

義陵晚照

詠八景

泰議梁

綱邑人

幾從隴上頌思文濯彼溪毛擬報君遙想精英何處
所芙蓉七級掛晴暉

稷峰疊翠

姑射仙人去不歸滿山冰雪尙依微尋仙幾度無消

息獨有嵐光對夕暉

姑射晴嵐

彼美人兮䟽屬陽文星光燦少微旁雲開洞口翻成

陣散入人閒片片香

文洞飛雲

仙人手掌大如箕擎出蟾宮光陸離更待秋風飄桂

子憑君折取最高枝

仙掌擎月

城高玉壁入秋冥萬木迎霜色尙青爲是軍興千載

上故分協氣入生靈

玉壁秋風

汾流西入大河中舴艋孤飛勢轉雄待得秋風來海

上乘槎直入斗牛宮

汾水孤舟

一泓深處是龍湫水浸平沙日並流自是地靈不愛

寶故分春色照麟洲

甘泉春色

憑將甲子問眞元賴得君家歷象存却恐虞淵淹日

馭故畱雙塚照乾坤

義陵晚照

詠八景

知縣鄭命邑人

峰巒南望勢嶙峋
祠廟千年薦藻蘋
謾詠思文追往事
幽懷還欲繪流民

稷峰疊翠

姑射神人跨鶴飛
雲霞綽約尙依稀
幾番欲覓眞仙訣
獨有嵐光映翠微

姑射晴嵐

門掩苔蘿不用名
琴聲松韻有餘清
只今洞口雲猶在
獻策何人保太平

文洞飛雲

仙人遙向紫雲端
仙掌空畱素月團
待等秋風凝玉液
願分金露滿金盤

仙掌擎月

玉壁城邊汾水流
烟寒風冷白雲秋
啼鳥似帶興亡
恨夜半啾啾舊戍樓

玉壁秋風

悠悠汾水自東來
舟楫孤飛日往回
贏得一竿閑歲月
不知身世是蓬萊

汾水孤舟

一泓深處是甘泉
花柳霏芳艷色鮮
莫道三春餘樂事
年年洒淚濕牛眠

甘泉春色

黯淡荒原望不窮
斜陽古木自西風
當年治歷人何在
陵墓依依晚照中

義陵晚照

登稷神山祭后稷

縣令

楊文卿

鹽山人

后稷神功已配天荒祠自合插雲端憑高霧氣千岩
隱入洞陰雲六月寒石磴苔深人跡少山田沙重馬
蹄乾遺民愛養無良術潦倒頻年愧素殮

后稷廟有感

縣令孫倌
安化人

古廟羣峰表粒源萬代宗壑深紅雨足岫疊翠烟濃
貨聚皆田器工通盡野農薦蘋瞻拜後仰止思何從

文中子洞

知府王時濟
邑人

王子藏修地千年石洞牢徑幽人罕過林黑虎常號
化妾黃可近西來華嶽高異時懷仰止聊爲薦溪毛

王壁故城

王時濟

玉壁空城隱暮笳
鄖君曾此建高牙
鐵騎戰後餘秋草
金鏃拾來半吐花
落日斷雲歸古堞
西風獨木噪寒鴉
當年勅勒歌猶在
眼底興亡更幾家

謁漢文帝廟

王時濟

別殿秋風裏何年
鳳蹕行天潢分代
邸玉璽入咸京
古棟丹青落巖扉
石竹傾異時臣子
禮猶若對英明

薛萬徹廢廟

王時濟

登高一弔古葉落
滿秋山廟廢千年
後名畱片石間

頽垣餘鳥跡剝瓦剩苔斑蘋藻知誰薦閒雲自往還
過平隴二段故居

王時濟

策馬過平坂愀然眺廢墟家稱喬木後業墜世臣餘
有鳥悲先壠無人式舊閭溪毛深欲薦落日轉愁予

過華峪故城

王時濟

秦晉分疆地周齊割據年孤城千里戍萬命一時捐
廢堞生秋草空林起暮烟於今傳部曲愁絕百升天

佛閣寺

王時濟

步入招提境門蘿上翠微樓高雲影落林靜鳥聲稀

花雨譚今夢風旛看夕暉室中跏坐者空爾悟禪機

其二

王時濟

山寺擎天末攀藤跡更幽長風吹短幘落日隱層樓
貝葉聞僧語石町看鶴遊望中興不極欲去復夷猶

登佛閣

王時濟

高閣稜層入碧霄登臨此日喜僧招窓中雲度晴飛
雨檻外河流暮起潮禮罷香燈如見佛坐來鐘磬忽
聞韶他時免向廬山隱已卜青林遠市朝

晚登城南樓

王時濟

霽雨新登閣孤城澹晚烟疎林不礙日遠水故啣天
雁陣斜衝塞鷗羣半在田物情欣自適倚杖且盤旋
登城懷古
王時濟

孤城雄據自高梁目極雲空引望長水怒洶濤驚汨
沒山行遠勢辨微茫霸圖事往猶稱晉風俗年來不
似唐獨把一樽酬古昔九原何處思徬徨

弔鄭烈婦

縣令

劉一相

長山人

鸞馭西飛海上遊只今黯淡此荒邱白雲潯水清湘
墓明月姑山素影秋話舊梁空悲燕子觀風雪涕說

雕鳩千年芳烈枌榆在極目寒烟不可收

演武廳簡士因遊佛閣寺

縣令

李希名

蘭陽人

振鐸東郊列控弦旌旗獵獵拂朝烟柳營簡銳知雄
畧蘭若尋幽了世緣飄緲琳宮分勝地莊嚴梵宇見
諸天孤鸞剩有雲霞賞林際憑虛憶昔賢

晚登稷山

縣令

劉三錫

大興人

野寺鷄聲月隨風蕩客裾隴雲益耕犢山色入行輿
地勢旋螺古人家陶復餘我思還雅化寧使願成虛

畱題梁氏眞隱園

劉三錫

佳園名共遠今始快同遊袖挹金風爽杯搖樹色浮
新聲聞管籥舊業見箕裘愧我初衣末焉文尙此畱

觀葫蘆泉

劉三錫

攜杖觀流水清澄到客心發揮道自妙含蓄意俱深
色借山頭翠聲諧澗底琴微風動蘋末波色晃衣襟

遊梁蕙散莊

劉三錫

結亭何翼翼望望見橫牆水護臨城寺花開隔井塘
四圍多茂樹一逕入虛堂我欲時時往寧期沃酒觴

過西長寺

劉三錫

曠野原蕭索深冬倍寂寥老僧依廢寺病客度危橋
香絕蓮臺火鐘沉梵韻敲低徊不可住暝色望中遙

高歡城

劉遂初

魏相旌麾夕未還鄖公名節蓋人間盛朝文化無烽
火玉壁關頭月滿山

題梁靖孝葦川別墅三首

狀元朱之蕃

翛然塵外會天真不爲名高厭世人兀坐蒲團渾了

了閒行竹徑摠申申

真隱園

爲羨山家樂事悠無絃瑟鼓御虛舟只從中聖從吾

好縱有還丹也不求

行意堂

磬聲戛戛意閒閒靈韻鍾將泗水潺不是無心關世

慮孤雲只合寄青山

浮磬

國朝

寄贈張孝廉垣

大學士

田從典陽城人

聞道河汾老今如伏勝年便便富六籍濟濟衆三千

定抱龍門策同欽干木賢何時將命駕重問孝廉船

大善古栢

庠生李毓秀

絳州人

大善之名何自起大善之實何爲是或問祖師西來

意乃云庭前栢樹子維栢森森鎮坤方拏雲濯霧嶙
峴裝陽春芳遜桃與李嚴冬姿傲雪共霜一本雙幹
屹相向高節崇兮浮雲抗不摧不改多坎壈敢言修
善不著相誰則取皮得其枝誰則取髓得其脂惟有
幽人能正性惟有君子能順時銅石根柯衆愛惜旦
夕拜號色變易自是忠孝誠所感慎莫認作娑羅宅
可恨妄傳記洞冥桑枯海竭惑人聽又怪異說長笛
聲月盈伐枕驚木鳴君不見東魯孔氏廟二十四株
抱相肖君不見亳郡商家社六百餘祀秀諸野摠之

積善有餘慶不善豈能免百殃明性本善止至善枯
栢豫章成棟梁無善無惡心之體作用是性爲根柢
願得歲寒後彫人出將穢雜盡一洗栢兮栢兮傳皇
初周鼎夏璉並商瑚爲問佛門善知識祇樹較此今
何如

稷山義民尋弟詩

有序

大學士

陳廷敬

澤州人

稷山義民吳伯宗世爲農民父母早亡遺三孤

子伯宗長也字其兩釋弟稍長前後皆爲人所

掠賣伯宗行求之十年餘皆得之晉多孝弟力

田之夫其猶有唐堯虞舜之遺風也歟如伯宗者豈非其人歟顧題之義民云者以見風之被於民者今之風猶古之風也爲作稷山義民詩以告世之爲兄弟者

稷山有義民賢者諸孤兄時余在直廬聞之安溪公就公亟問焉吳姓名伯宗公語其大畧豁然開我胸退食訪此人延之於堂中冠帶肅賓禮答言何冲融謂此民本分誤達長者聰余曰子賢人寧與世人同十人九不見於子慶相逢發言初逡巡坐久言疏通

十三喪父母遺下三孤兒大者伯宗是次者五週基
小者才一歲呱矣聲最哀民則具口食力耕田蒺藜
蒺藜拔復生惻愴中腸悲農夫常在野兩孤莫能隨
三步一返顧五步一徘徊與孤同形氣戚戚繫所懷
老死蓬茅下義不相睽離行歸自田閒小者忽如遺
入門左右視上堂淚眼窺出門復入門不覺白日頽
空房坐欲噫夜永荒鷄啼兒生不識父提抱今游嬉
鄰里八九家聞言各嗟咨旦則輟耒耜暮則忘饑疲
或言浮屠者告官請察治辭窮乃自伏果是浮屠爲

浮屠實賣兒買者知爲誰官亦不復詰浮屠去莫追
民願得我季焉能事羈縻辭官捨浮屠號咷於中達
四望蒼浪天天高意難知或在海之角或在天之涯
我生與我季生死相因依徒步自茲始惆悵於路岐
東西南北路此去是耶非慙退却復往已過還更回
維南則之豫惟東則之齊又南則之楚北至於燕畿
自南以自北自東以徂西之秦又之蜀訖於西南陲
匍匐以問訊往往涕交頤行者競酸鼻居者乞哺糜
還家望林木草徑風淒其門閉防掠賊狗吠人踪稀

叩門慘顏色未入先歔歔詎知昨日前我仲亦被欺
此生不卽死面目何由施人生如樹木心傷披其枝
枝披女四體體毀心先摧生平不相見死日見有時
昭昭白日迴漠漠黃泉低陟高望二親正見墳纍纍
適有北客過說弟在京師蹶然奮翼起恨不速飛鴟
高家我恩人養弟同父慈去時年十二二十今有奇
又問我仲信寧古塔趨馳感高公厚德贈我以路資
行行別我季慘澹別轉遲仲返我疾足虎口騰險巖
是時天嚴寒足指兩交墮至則仲主家力拒無好詞

冒死赴轅門大將森鼓旗軍民皆恐懼無敢干以私
始猶肆捶楚流血紛漣洏既乃大感悟義士其識之
遂使還我弟萬里偕來歸予因李公言記事之細微
微公失此人傳聞恐參差表之曰義民實堪達者儀
不見吾唐風憂深有遠思孝弟萬善本勸善無刺規
世閒兄弟輩請觀枕杜詩人人有親長與世旋春熙
題文中子讀書處
大學士
吳山璵
沁州人
廢洞依稀石麓陰山靈招我一來尋泥橫殘篆碑猶
在門掩蒼崖鳥亂吟獻策緣知非釣主退耕何事已

違心浮沉千載誰能識
房魏區區尚古今

題還竹軒

姚延啓

幾樹閒花幾竿竹
何須千畝等候祿
倩天出雲作幕
帶映水搖紋漾綺縠
浮圖矗矗卽青山
籜破欲飛偕
尺木凡卉詎敢並
清貞周子蓮花陶
令菊將來嶰種
大如椽三弄侑我
青州麴書成仰面
風前立但看龍
蛇爲起伏疎櫺
月上影婆娑
個個分明碎
青玉春時
湘水夏雲濤
秋伴霞光冬
滕六眼見綠
翠自成陰有
酒興來招不
速鳴琴暇日
自登高催起
龍文千萬斛

與可當年爲愛君至今遺下簣簞谷燒笋爲蔬酌半
醒果然不用東坡肉漸漸琅玕透短牆畢竟風烟饒
雪屋勁節虛心誦有斐應笑殘膏與剩馥三杯雀舌
一爐烟瀟湘流盡霜毫禿但願棠花竹實豐萬戶謳
歌咸鼓腹

詠八景

畢際有

教稼神功克配天肇開姬籙頌綿綿烝民嗣歲隆禋
祀翠巘崢嶸好共傳

稷峯疊翠

長河浩浩日西流隄畔常橫一葉舟回首斜陽人問

度蒼霞白露報新秋

汾水孤舟

雨歇烟收望月華晴巒捧出半輪斜掌中應有金莖

露肯與詩人滌齒牙

仙掌擎月

洞裏閒雲日杳冥洞前流水草青青卽今墨瀋餘香

在還似當年續六經

文洞飛雲

一溪如帶遶城廻百卉爭春伴早梅自是陽和隨地

普不關春色猷栽培

甘泉春色

共道勲州戰蹟崇長河高壘咽西風昨來牧豎傳遺

事半旗今猶出土中

玉壁秋風

石壁嶙峋倚紫霄雨餘雲色鎖山腰輕風拂翠光如
滴疑有仙姝佩玉瑤

姑射晴嵐

綠樹寒烟隱夕陽堯臣元室斷如堂中天歷象垂今

古宜配明禋陟帝傍

義陵晚照

喜雨四律

縣令

顧涑初

歸安人

阡陌浮陰綠離離望澤深寒烟迴萬壑暝霧暗千林
樂酒仙成氣樊噲幻作黔甘霖三日沛婦子動謳吟

其二

久嗟天事困誰念小民憐乍動鞍山鬣寧須石洞鞭

長河馳鼓浪遠岫掛鳴泉千畝沾優渥欣歌大有年

其三

雲漢頻勞嘆何時石燕逢懲躬慚六事時雨慰三農
片靉飛朱馬中方起赤龍野人忘帝力耕鑿水雲重

其四

遙空來爽氣天意洽人情夜月光離畢長星曜隱庚
瞻蒲堪勸穡望杏樂敦耕民鮮東人嘆清時頌太平

詠八景

顧涑初

翠鎖煙凝別一天崢嶸廟貌爲誰傳只今粒食神功

遠擊鼓吹幽咏大田

稷峯疊翠

雨霽峰巒秀色開鶯啼鶴舞好徘徊當年綽約人何

似幾度携琴訪綠苔

姑射晴嵐

傳經絕業幾春秋石洞松風一徑幽高士已隨青艸

沒文光時作白雲遊

文洞飛雲

何處仙人架玉盤清輝握取碧雲端山頭斗隱蟾光

遠掌上空畱金露寒

仙掌擎月

盈盈一水灌平沙草樹芳菲爭翠華何處春光不明

媚東風先已遍溪花

甘泉春色

玉壁城邊舊戰場到今成敗一蒼涼金風颯颯吟秋

壘月冷雲迷草不霜

玉壁秋風

銀濤雪浪影青山一葉中流時往還最憶夜深人渡

後滿盤風月水潺湲

汾水孤舟

千古人欽歷象功蕭蕭陵廟小城東晚來煙草迷離

處鵲噪鴉飛落照紅

義陵晚照

癸丑春雪

顧涑初

峭寒乍透小樓高一夜連霧散玉綃穠杏輕勻瓊女

面垂楊嬌舞素娥腰珠簾驚捲姑山近翠幙新開稷

岫嶢瑞著豐年誰獻賦兔園旨酒醉春朝

其中辭帝

登文昌閣

顧涑初

高閣登臨地羣峰入望齊
奎光凌碧漢劍氣燭青霓
城郭樓前迴烟霞檻外低
披香一瞻拜俯仰漫凝睎

題循卓集後

徵君

吳人雯

南州人

我師清韻古難儔學海傳今擁上游
荆水曾空花發浪銅峰練帶潔如秋
民眈得渡慈津遠桃李成陰覆露優
勝績芳聲流不盡文章勲國兩相酬

詠八景

王震龍

功開稼穡古農官山以神名永不刊乃粒當年垂帝

典思文今尚寄煙巒

稷峯疊翠

東來汾水遶山城薄暮仙舟一葉輕疑是乘槎來海

上登仙徒有望洋情

汾水孤舟

有客當年續六經五雲片片護幽局續經人去今千

載尚有飛雲洞口停

文洞飛雲

何物仙人畱異踪掌痕擎出月溶溶千秋風雨剝不

盡疑對炎州五老峰

仙掌擎月

陽和大地本無偏此處獨分春色先疑是其中涵帝

澤凌冬煙草傍幽泉

甘泉春色

勲君昔此建高牙殺氣雲深慘暮茄故堞今應枯蔓

草秋深何事少霜花

玉壁秋風

貌姑昔已御風飛賸有精英寄翠微雨後迎曛光欲

滴令人千載想裳衣

姑射晴嵐

肇開厯象亮天工賓餞猶傳帝世功漫效揮戈西日

手至今遺跡夕陽中

義陵晚照

汾川秋望

郭爲崧

猗氏人

竟日幽居木榻穿無端趁興到汾川雞心棗向溪邊

剝鷁首舟從水裡牽
雀噪蟬鳴沙渚暗
雲飛雨過晚峯妍
農人只愛田多稼
誰遡思文績配天

遊嵐川寺

郭爲崕

廿載奔馳素願違
爲尋惠遠叩禪扉
半巖月照諸天曙
上界花開萬戶輝
流水無心隨徑轉
幡風有意帶雲飛
憑誰領取蒲團趣
獨倚欄杆覽翠微

詠十景

縣令

張應辰

汝州人

稷峯疊翠

台隈躬耕地平林繡嶺端
桑麻千頃古嵐翠一峯寒

義陵晚照

陵是義和跡虬松半夕陽當年鞭日馭留照送輝光

文洞飛雲

授徒多國士經世有鴻文欲訪讀書洞空山禮白雲

玉壁秋風

樹幟遺雄壁霜飛柿葉紅夕陽殘壘上禾黍起西風

仙掌擎月

巨靈曾劈岳指臂翠摩天索得明珠影飛來掌上圓

姑射晴嵐

仙在河汾曲爭傳姑射名雲端青黛色晴翠滿山城

甘泉春色

甘水雪霜暖留春歲月賒仙源如可到今古有桃花

汾水孤舟

秋風汾水上波與遠天開兩岸垂楊渡孤帆載月來

大善古柏

葉冷梵宮月幹撐姑射雲願留霜雪操同封漢將軍

懸崖濺玉

誰瀉玉玲瓏空山雨乍晴炎天飛雪色月夜滴琴聲

大佛寺

古刹翠微間
禪林第一關
客來幽鳥起
雲去老僧閒
翠柏巖廊靜
蒼苔碣字斑
何妨重九過
逸興更登山

汾上晚歸

暮景到林鴉
歸鞭夕照斜
斷水隨岸水
寒雁聚汀沙
橋樹通村路
樓船起浪花
西連河曲水
擬約上星槎

月夜赴絳州

日下海雲邊
行人促馬鞭
涼風生古樹
素月出寒天
犬吠遙村雪
鐘鳴晚寺烟
絳城前路近
燈火滿江船

早雪發太圖村

仲春氣候改冰霜近銷滅昨夜東風來草木皆欣悅
凌晨發北岡紆鬱過山缺堤樹籠寒雲隴麥鋪微雪
姑山白皚皚天地成皓潔朝霞漏日光曦影射巖穴
喜見桑麻潤青翠可攬結寂寞短亭柳絲柔未可折
幾時好歸來鶯啼杏花節

五龍宮

寂寞仙都避俗氛隔溪樵語半空聞厨通瀑水烟中
雨叟沈青山夢裡雲鋪影翠嵐供嘯傲幽香竹柏襲

清芬秋高擬上天門頂絳野河源四望分

汾水初漲萬艘齊至頗有江淮間意聊作短述
邑是澮汾流惡去河仍雍絳泛舟廻人牽錦纜排鴻
過舸湧雲帆陣馬來岸影澄空浮縣郭波光遠樹映
樓臺西歸會注龍門水助上星槎八月雷

廉將軍祠

在廉城村

遺城虎柝久無聞秦晉關河此地分爲是將軍征戍
地至今殘壘起寒雲

魚兒灣口占

逐日風塵道路間
兩旬六度絳城還
歸來却羨魚灣
水萬頃烟波一鷺閒

和王山長武逸園褚香谷半隱亭坐月元韻

桃李春風處翼然見此亭
堦前芳草綠郭外遠山青
佳句鳴鏘玉高賢聚德星
愧我勞鞅掌鈞奏喜曾聽
兩月以來數赴絳城途中感作

驅馬古縣門東望廉城里
我行何爲者奔走苦未已
悠然躍川魚宛在水中沚
翻然投林鳥翔集忘所以

海闊天空際物情信適矣
吾生何勞勞車馬風塵裏

村樹姑山雲樓船汾河水連月往復來數憇將軍壘

廉城里卽
廉頗戍處

西飛逐日丸栖栖何曾止是時秋雲鋪豆

熟香稻美人家岩畔住柴門炊烟起行行至絳城樓

榭雲外指

赴嵐川寺山行途中

仙源深處有桑麻一桁晴嵐郭外斜澗水橫吞樵客
路嶺雲低度野人家黃蘆古渡飄寒雪紅葉西風亂
夕鴉記取藐姑山下景歸來猶帶古烟霞

立春後卽赴絳城途中作

飲罷椒花趁曙暉
穿霞旭日上征衣
蒼茫遠樹烟千點
寂寞寒山碧四圍
凍解魚牀侵岸起
舟衝雁陣入雲飛
從今始識東風面
紅紫芳菲次第歸

清明日由南陽村赴縣

十載宦遊憶故園
清明作客倍難論
歸心和夢思鄉壠
返照隨人到縣門
紅雨杏花岩畔寺
綠風楊柳水邊村
前年此日襄陵道
駐馬虹橋酒一罇

去歲赴關北清明日

過襄陵飛虹橋酒店有客路聊
酬佳節好一壺村酒甕頭春句

春郊

吏舍何勞勞簡牘日相迫今晨北郭門愛此烟柳色
微雨過清明晴郊靄芳澤紅杏綠楊村白蝶黃菜陌
天然春明圖和風漾新麥姑射出片雲影似宦遊客
薄施潤物功悠揚林壑白到此塵慮輕蓬壺澹心迹
歸來已斜陽汾水遠天碧

赴絳州途中卽事

柳外桃開郭外家沿溪十里醉紅霞行人馬上匆匆
賞不負春風一度花

由絳赴稷途中

鞅掌風塵客歸心路共長錢飛榆圃老翠漾麥花香
隊甕添新雨江船載夕陽烟林投縣郭高在水雲鄉
早謁羲和祠遂赴嵐川寺驗水渠晚歸之作

早謁羲和霧露間林扉旭日到松關龍溪瀑下嵐川
水壺口雲生姑射山郭外撫民聊遣興輿中耽句是
偷閒晚歸經過蘆泉路殘雪荻花月一灣

新正十二日赴絳城途中遇雪作

同雲密布玉霏霏客踏瑤華一徑微曉霰寒銷冰署
酒輕霜暖避白狐衣嶺邨芳樹花爭發綺陌春風蝶

亂飛寄語新晴元夜月今年皎潔倍光輝

由鄆赴稷萬泉道中

發軔中條地遙林共鳥還客心爭赤日歸路指青山
馬踏雄籓壯人耕大野閒風塵慙俗吏又上白雲灣

登大佛閣

長空霽雨洗囂氛野外筵開眺夕曛寺瞰蘆溪沿壑
樹亭高姑射壓峰雲叱耕簞笠東西嶺抱日虹霓錦
繡文案牘稀緣薶麥熟一樽聊對樂南薰

乙亥麥秋公餘小吟

愧乏鴻才濟吏衙閒中事業轉堪誇
蔭芳安置蜂王國補棟添修燕子家
盆養魚苗游荇影堦培書帶長
蘭芽編籬深護新栽竹引水閒澆舊種花
倚樹讀書觀鳥篆臨池學帖羨龍蛇
時移小榻尋莊蝶自改前詩點墨鴉
問字濡毫酬稚子試勤闢地驗桑麻
喜逢麴麥人爭穫惟聆晨昏鼓報撾
遣興層臺時一上城頭姑射看飛霞

文中子讀書洞

張應辰

高人隱處鵲巢棲翠鑿巖屏碧落齊
蠟屐身攀鞭日

馭振衣石踏上天梯

一徑直上
號梯崖

橋飛丹壑捫蘿渡壁

起白雲護洞低時際太平無策獻書臺峯頂看畱題

重陽擬登大佛寺有事未果途中漫吟

准擬重陽上邱樊平明出郭眺寒原秋郊已豁登高

眼佳節何勞招客樽碧草黃花山下路西風紅葉水

邊村歸來更步層臺上姑射千峯對縣門

再赴河津途中作

落葉西風剛未休殘陽驛路酒家樓此行辛苦還乘

興十日龍門兩渡遊

文中子讀書洞

府經

張西崑

汝州人

客訪仙臺古揚鞭自在行雲山爭輔向花鳥解歌迎
綠野蟬鳴樹斜陽水抱城禹門西望近浩蕩遠波生

咏十景

舉人

王墀

汝州人

盤紆涉危徑懸崖見水府細脉滴空潭清疑聽疎雨
便擬調素琴彈作響泉譜

懸崖滴水

大材解藏器大善無近名漢封豈不顯養晦全真精
會乘風雷作霖雨施蒼生

大善古栢

稷陵踞峯頂亘古成稷峯阡陌莽迴錯翠疊千萬重

惆悵教稼處隔林聞遠春

稷峯疊翠

姑射多奇峯繞郭韻清絕濕翠生晴嵐縹緲散林樾
仙洞深幾許皎若照冰雪

姑射晴嵐

太平策獻罷傳道息巖壑緬懷隋唐間不負平生學

洞雲流餘芳豈獨續經閣

文洞飛雲

不借巨靈擘天然標奇狀中天華月懸宛托仙掌上

盈盈一握間清影射千嶂

仙掌擎月

甘泉冬不涸溶溶春意暖細草縈淺流曲隨綠波轉

時見沙禽飛悠然芳情遠

甘泉春色

秋風生玉壁颯颯隔汾曲百戰空齊師留此勲州躅

不見巖畔草霜天色猶綠

玉壁秋風

隔岸楊柳疎汾曲風露冷伊誰棹中流乘月翫清景

人聲寂不聞孤燈晃帆影

汾水孤舟

鞭日升太虛懸車焉得駐尋陵仰中天疑有神靈聚

餘暉已西沉猶照祠前樹

義陵晚照

初冬偕友登大佛閣同賦

教諭

徐振基

陽曲人

飄颻葉聲寒天迥野色寬遣懷動游屐携伴登峯巒

峯巒迎面起尋勝端在此清涼隔塵氛蓬壺境差似

碣字壁上鐫古栢階前峙禪房曲逕通步步勞翹企
紆迴臺榭中雕欄頻徙倚轉上絕巔攀層閣金身十
丈雲霞落古刹巍巍矗青霄爽籟清虛開岩壑遙空
漠漠點寒鴉蘆渚蕭蕭噪晴鵲一灣溪流抱村墟三
里人烟鎖城郭君不見九華之山山九峯生於霹靂
化於龍夢得一見驚魂魄勝地於今留芳蹤又不見
敬亭之山疑海嶠落日峯頭暉照曜一自章句動宣
城峻嶺崇岡屬謝眺今陟北頂望姑山崢嶸氣概接
仙關諸君濡毫增山色清詞高妙不可攀

大善寺古柏行

甲戌五月便道遊大善寺見古柏奇偉流覽久之欲作詩炎天

少興不果廿六日雨後清涼賦古柏行以延爽工拙非所計也

乾坤瀕洞白日夕乘龍夭矯二千尺忽乘風雨謫九

天墮地森然爲老柏老柏屹立幾歲年見之令人動

心魄長留梵宇飽風霜笑兀離奇同社櫟豎不數丈

橫倍之慘裂蘚皮露鱗骼枝柯雙聳勢攬挐傾側吹

香蔭寒碧直疑呵護有鬼神遂爾斧斤逃匠伯秦岱

峰前蜀相祠徃徃並爲人愛惜何君倔強不受憐匿

跡自甘遁荒僻茫茫歲月過隙駒對此翻令感今昔

劫灰歷盡其天全無乃潔身蹈海之魯連不爾亦得
不死之藥如徐福靜閱蚩蚩笑蠻觸君不見秦時松
有五大夫載在史冊當非誣又不見漢武所封三將
軍得名當代爭傳聞嗚呼世間顯晦亦偶爾君其慎
無失所恃五陵裘馬幾馳驚掉頭安用邀一顧迄今
幸際
聖朝有道時承平萬物長育咸得遂其生召棠孔檜去
人遠惟君老去餘典型山樞隰榆皆儔侶耕夫牧豎
相逢迎我才遠遜杜陵叟尚能爲賦古柏行

咏十景

碧巘嶙峋望不窮
思文教稼溯神功
峯巒巒絕頂叢祠

闢翠靄層層疊遠空

稷峯疊翠

雨後晴煙逗遠山
嵐光滴翠聳螺鬟
眉痕一抹皴濃

黛姑射英靈自往還

姑射晴嵐

獻策歸來夢亦清
名山著作謝塵纓
雲封石洞高風

古獨坐神龕對月明

文洞飛雲

蟾蜍光皎射山巔
影落高峯別一天
彷彿仙人擎巨

掌清霄朗澈淨雲煙

仙掌擎月

曲曲泉流枕郭斜
叢生幽草翠交加
劇憐此地春常在
開遍村溪爛熳花

甘泉春色

陡聽風笳憶建州
勳公戰績炳千秋
烟寒月冷尋遺壘
絕少霜花到嶺頭

玉壁秋風

遶堤楊柳縈汾水
隔岸煙雲籠渡頭
月夜無人風鼓浪
片帆孤棹泛仙舟

汾水孤舟

義陵古樹鬱青蒼
賓餞中天効贊襄
何事高山迴日

馭祇今晚照滯斜陽

義陵晚照

轉壑梯雲古洞深
懸崖蒼翠鎖秋陰
兩泉濺地如霏

玉清韻琤琤響石琴

懸崖濺玉

歷盡風霜突地撐稜稜老氣自縱橫捫苔挹秀菩提

樹籟響疑聞梵呪聲

大善古柏

赴華峪看水渠郊行卽事

張應辰

一葉涼生虫語聞怡情郭外豁囂氛翠屏千笏飛紅

日秋稼連邨布綠雲烟月歸心懸汝潁風塵事業付

河汾星輅又上姑山頂四野澄清萬象分

咏八景

洲判白

泰清澗人

長區開闢自唐虞百里山川入畫圖翠疊稷峯層嶂

合烟橫汾水片帆孤彩雲近護文中洞明月高懸掌
上珠地起夜臺留夕照天垂嵐氣隱仙姑甘泉瑞靄
春常滿玉壁風清草不枯人物而今猶古處半勤穡
事半爲儒

大善寺古栢

栢之古者甚罕觀予所見晉祠朝陽洞漢栢二
株及予邑狐大夫廟栢俱霜皮溜雨黛色參天
觀止矣而歷落奇崛令人震耀心目則大善寺
栢得從來所未有蓋古而兼怪者也稷景有八

棄之如遺覽邑乘蒞斯土者與其賢士大夫題
咏亦絕少噫古難識矣怪又甚焉奇才俗眼白
千古一轍可慨也夫

教諭

武錫九

交城人

鑒拔何由逢真識才老風塵罔不盡大善寺栢貴知
希節錯根盤獨挺特般若花飄法雨滋神工鬼斧恣
其力歷劫不磨霜雪深偃蹇而驕狀未得恍如米顛
袖中石皴透瘦砌成岐嶷又如天門鳳闕峩龍驤虎
臥變難測金身丈六現神通陸離光怪創心臆我來
至此久躊躇繞樹行吟氣轉塞從來才大難爲用况

兼天陰月黑雷火逼安得置此大厦支望爲神物千
秋式

秋日城樓望眺

官冷兼秋老登臨意境同天空高薄暮木落響寒風
髮白還悲禿詩工半藉窮歸來愁獨臥夢到卻湖東

九日登大佛閣步黃三橋韻兼呈周理賢并贈

別

無端秋老碧天高地接烟霞逸興豪冷入心脾白入
髭時宜風雨節宜饒山空落木餘紅葉眼急蒼鷹側

羽毛飲我醇醪消鄙吝一聲長嘯滿晴臯

感憤中來讀楚騷問天天遠更兼高途窮阮籍惟澆
酒命蹇劉郎不賦餒最是知心堪把臂非關隕涕醉
揮毫行旌欲動情無限頭白訂交許幾遭

孟夏偕褚香谷訪思文書院山長王麗堂半隱

亭對月之作

涼風習習疑秋令青燈呬唔愜幽性姑射乍開冰雪
天霏微玉屑斜花徑崆峒美人萬頃波手持并剪裁
雲羅聲落九天發歌嘯臭蘭垂露嫣然笑月中仙桂

吹古香少微星冷吐寒芒誰瀉銀河直灌頂洗我多情九迴腸

別大善寺古栢

神閑節勁碧蘚文寂寞招提不逐羣萬古幽光誰識爾百年迂腐獨憐君風敲玉碎檐前馬雁叫聲殘日暮雲無限低徊何所思滿天花雨落紛紛

代古栢酬韻

瀟瀟風雨感斯文世外訂交別有羣飽盡烟霞心似石消磨歲月我如君塵緣已定三無戒老眼惟開萬

壑雲最愛卦山龍臥樹枯枝苔鎖自繽紛

夏夜同武逸園訪王麗堂山長半隱亭坐月分

賦

訓導

褚齊亮

曲沃人

小隱隱山林大隱隱城市超乎二之間隱居誰與比

炎天地似蒸涼夜明如水偕步趁景光思文

書院違尺

咫尺就中長嘯人疑是汝南許

山長汝州人

既見載言歡相

對一亭子云以半隱名畱題榻高士嘆息令尹賢流

連風物美清我跡與心蔭茲桃與李舌本餘茶香談

鋒屑玉齒神超塵囂外影浸冰壺裏閒散奚不平沉

淪乃得此城市而山林求志探妙理坐久寂無言君
眠吾去矣

初冬九日同王麗堂葫蘆泉閒步

未獲風穴遊

風穴爲汝
州名勝

且尋清幽境行行出北門頓

覺塵慮屏木落大地寬天高平野靜姑山霧沉沉睡
意遙可領小憩麥隴邊猶似陽春景向人綠旂旄烟
痕未全冷迤邐蘆泉來寒流傍古井人家物外間居
者多不省森森叢栢林英英白雲影西顧陟崇岡豪
興亦何爽雖非層巒秀廓然涉遐想原濕汾水流霄

漢浮圖上茫茫大化中無由亟蒼莽人生自跼蹐字
宙本開廣感嘆昔遊人何必悲俛仰不見牧羊兒忘
機倍跌蕩

遊葫蘆泉歌

泉在稷山縣城北三里形如葫蘆
舊流入泮池今已久涸邑人以爲

文脉
所關

城北三里葫蘆水曾入泮池養龍子文浪芹枯鯉魚
飛雖有風雷震不起何以導之我心憂卜日聊同泉
上遊泉上草木足欣賞泉上形勝足勾畱直北一帶
姑射近神人綽約何處問風鬟霧髻飄渺間洞口桃

花餘紅暈迤邐以南平疇寬俯視城郭元氣含東西

廟陵相約束

東陵大佛閣
西陵泰山廟

葫蘆佳景何鬱然天既別

有泉更瑩元冥默司水衡柄盛衰循環三十年以時

考之今當王

相傳泉水三十年一
王今已三十餘年

泉兮泉兮其安流

既不願爾浮海走萬里亦不願爾上天霖九州但願

負之而趨藉有力流入泮池銷我愁驚飛文浪長悠

悠

稷峯疊翠

巖壑靄重重何時稷有峯名山揚偉烈疊翠表奇蹤

天配蒼蒼色神傳漠漠容經今千萬載未許白雲封

姑射晴嵐

仙境傳姑射嵐晴見一斑翠屏橫北郭紅日笑春山

遠樹峯頭靜孤雲嶺上閒神人何處所綽約有無間

文洞飛雲

策罷公何損名稱氣亦舒杜房皆弟子山洞樂居諸

傳鉢經綸出從龍翰墨餘太平雖未報飛作五雲書

汾水孤舟

一葉藐夷猶孤標物外游斜陽汾水曲明月小船頭

柳岸行踪絕山鐘遠寺幽曉風殘夜裏疑是泛仙舟

玉壁秋風

偉著防齊略伊誰第一功關西真臥虎神武漫飛龍
勅勒悲歌壯汾川古蹟空餘威畱玉壁凜凜盡秋風

仙掌擎月

如指詫天成仙峯落照明恰當山處缺宛在掌中擎
桂影和盤托神工特地精此時參妙諦萬里印清清

甘泉春色

景說山村好隆冬是小春分甘泉細細暎碧草潏潏

潤以溫能借芳緣暖更新廣方無畝許羨煞踏青人

義陵晚照

晚照意如何義陵諒不訛中天迴日馭此地駐恩波
閨想餘時勑賓應餞處多舒長襄帝治萬古仰人和

懸厓滴水

過寺向東北迤邐上更奇半山行欲斷一木妙能支
洞古厓懸鐵珠圓露滴池隨人多少飲無滿亦無虧

大善古栢

君子貴居易如斯豈不然一從依大善隨分伴枯禪

蒼古難爲態神奇與共傳何須棟梁用始羨黛參天
頌張嵩樓明府清明南陽道上詩感賦一絕

杏滿花村草滿堤清明烟雨總淒淒鄉心欲寄汾河
水不向東流只向西
四月管村道上

風吹麥浪綠交加一曲河流抱路斜最是清和天氣
好濃陰滿地落楸花

遊黃龍洞

教諭張澍
邑人

絕頂連霄漢憑高眼界明秋聲林外响野色望中平

泉向石間出人從鳥道行山僧堪共語趺坐話三生

遊佛峪

策杖尋山寺深山萬木秋峯連疑逕斷谷靜覺林幽
梵宇依雲結寒泉映月流塵勞何日盡長伴老僧遊

大善寺古栢

古栢奇如此亭亭繡佛前縱橫餘百尺上下幾千年
恠是蒼龍舞幽分白鶴眠後凋惟爾我方外結清緣

其二

舊到高渠寺披吟老栢前陰濃全蔽日世遠不知年

鳥宿隨風撼僧歸伴月眠重來無限意煞那亦因緣

遊文中子洞

恩貢

張育梅

邑人

爲慕先賢跡攀登疏屬山峯危樵徑斷林靜鳥聲閒
華岳斜陽外黃河指顧間扶筇逸興遠頻聽水潺潺

春雪喜作

徐振基

前見

春寒料峭雲模糊雪霏飄薄飛春初風號空際樹枝
響窓櫺撲灑聲嗚嗚去歲一冬苦燠若三白未見民
憂虞卻喜豐年今有兆清光瀼瀼如冰壺山城米價
亦云貴麥飯聊足供庖厨皓然冰署頗清絕閉門嘯

咏閒繙書於時三經稀客展寧嫌積素紛庭除乘興
不訪剡溪戴白戰試效眉山蘇更擬明晨覓畫手繪
作姑山雪霽圖

半隱亭月下侍坐

廩貢馬驤邑人

十載亭心月今宵始覺圓一時開講席千里集名賢
佳蔭滋桃李新詩入簡編清談忘漏永此景願年年
秋日偕友登大佛閣

結伴同尋勝登樓眼界空穿林秋水白遶寺晚楓紅
鳥語通禪性鐘聲出梵宮歸來明月上閒話過橋東

思文書院爲諸生勵業
前見

虛亭廣廈互迴環幽在嵩陽鹿洞間穿甃籬根來活水捲簾屋裏看青山流觀自愛三餘好折節難容半刻閒囑語河汾桑梓地高風努力共追攀

大善古柏

托根淨域渺塵氛天矯奇姿迥不羣百鍊堅心超浩劫一團冷翠聚香雲山精夜黑形全匿雷鼓天陰響乍聞早識蒼官靈異在榮封肯讓漢將軍

葫蘆泉

潁山縣志

卷之十

藝文詩

四

姑射峯前水蘆泉分外清
靈源通晉峪細脉落山城
棠蔭隨渠轉芹香逐浪生
無邊明秀意延覽動遙情

半隱亭坐月

有序

嘉慶壬申五月十有七日
外翰武逸園褚香谷
同馬翼亭監院過訪敝齋
維時皓月方升清風
颯至欣逢佳客綏念良宵
瀟騷蘿壁涼生杜老
之衣嘹唳鶴聲響澈逋仙之耳
亭名半隱饒有
風情坐喜雙清允稱雅集
竊願各吟佳句借畱
永夕之歡諒亦頗稱高懷
用抒風人之趣

勝事無前期客來月初上列坐環虛亭共挹金波爽
城市苦炎熱茲地頗幽敞露華明前楹清影動書幌
遂令軒冕客頓欲披鶴氅劇談抒夙抱高吟縱遐想
百年轉瞬間盈虧幾來往亭畔餘花落亭下新筍長
涼風鳴素琴超然脫塵鞅欲畱終夜歡漫聽漏聲響

崇山玉壁懷古
張受祺

邑人

齊魏紛爭地霜天碧草生斷雲依廢壘夕鳥下荒城
勅勒當年恨秋風萬古清空餘汾曲水雷雷暮烟橫

眺汾

卷之十

藝文詩

卷之十

七

汾流西瀉急雲樹正依依水氣澄秋寺波光淡夕暉
宿沙羣雁落載月片帆歸眺久蛩吟切漁燈隔岸微

秋日遊大佛寺

許作霖

邑人

崇山傑閣矗蒼穹勝日登臨眼界空半嶺斜陽明遠
樹滿溪落葉響秋風閒行看水依巖畔隨意尋詩到
竹叢更喜晚來歸路好蕭蕭蘆荻月明中

稷城古塔

武庠

武占鰲

汝郡人

寶塔峻嶒亘古牢登臨百里見秋毫凌霄作鎮橫汾

上疑是擎天王柱高

稷峯疊翠

典史

文調鈞

江西人

古墓荒祠峙遠空一灣螺黛疊千重地因人重名偏著德並山高祀應隆畎畝勤勞資粒食黍禾蓬勃想遺踪年年社酒雞豚會爲報當時教稼功

甘泉春色

山間風日最相宜爲喜韶光正及時岸柳新嬌春色早叢花明媚夕陽遲酒帘茅屋村如畫芳樹晴雲景卽詩慢道甘泉多淑氣也因侯德不偏私

文洞飛雲

洞口雲飛映遠岑
隱居遺跡尚堪尋
讀書自樂歸山志
教授猶存捧日心
泉石有情爲伴侶
煙霞無意結知音
當年若用先生策
未必瓊花入眼深

姑射晴嵐

崔巍疊嶂勢參天
姑射佳名久矣傳
排闥晴巒初雨後
看雲野叟晚風前
嶙峋秀出重霄外
蒼翠嵐浮遠樹邊
爲愛山光時仰止
此中應合有真仙

仙掌擎月

何年仙掌留真跡
姑射神人是與非
五指高撐分列

宿一輪遠照弄清輝
擎來玉腕披雲漢
捧出金奩掛翠微
長向九霄承雨露
掬風沐月任相揮

玉壁秋風

孤城據敵控汾流
玉壁猶存表壯猷
韋虎未全憑險阻
高歡空自費機謀
蕭條風色餘殘壘
黯淡雲容送晚秋
當日將軍功第一
酬庸還爲置勳州

義陵晚照

向晚高原夕影停
豈因祠墓式英靈
授時學究天人際
推閏功垂俎豆馨
古樹漫留殘照白
斜暉常映暮

山青義和伯仲陶唐佐千載神明在日星

汾水孤舟

繞郭汾流蕩漾西扁舟如泛五陵溪半高春水烟波
濶兩岸桃花村樹迷遠浦翠凝帆影靜孤篷人對月
華低櫓聲欸乃乘槎客一棹輕移傍柳堤

赴鄉村查保甲晚歸作

張應辰

幾處窮簷起暮烟閭閻撫後着歸鞭陌頭人返溪村
樹波口燈明雪岸舡思靖山城爲樂土敢辭星駕到
桑田歸來鷄犬千家靜北斗闌干月在天

由稷麓晚歸縣大風作

查保甲戶口

寒天赴南郊匆匆日將西暮色催還轅蒼然到林藪
歸路風益怒簸揚沙石走田家歇鞍馬茅簷一樽酒
犬吠村墟烟鴉盡堤岸柳大造鼓洪鑪中宵龍虎吼
莫再翻地軸誰爲轉坤手

時隣封平陸解梁等處地震傷戶口甚衆人馬

縮如蜎蓬轉夜將久月明經汾河連檣聚浦口遠岸
一漁燈蕭蕭人渡後歸來呼郭門漏鼓報何有欲問
夜如何低昂看星斗

春日郊行

春回草弄芽郭外問桑麻雁陣低蘆岸魚床漲雪沙
耕耘山是縣撫綏國猶家節憶清明近林間羨哺鴉

廉頗祠

深謀固戰樹奇勲氣作干城控絳汾戍壘殘陽畱趙

壁兵臺要路壓秦雲

祠南有練兵臺遺趾尚在

負荆足見推忠度

拾鏃還從故老聞

澗東農人掘地得古刀想係將軍遺物

魚鳥畏威連

牧寨

北隣十餘里有李牧古寨

雄風並祀李將軍

郭有道祠

邑侯

黃仁

漢家黨錮盡名賢獨有先生俎豆傳泐石不慚真氣

節同舟猶想古神仙能將白水迴瀾挽可奈黃巾滋
蔓延槐蔭一庭知手植飛鴉寒噪夕陽邊

祁縣爲祁大夫奚故邑旅中題壁

韓魏同時號大家老臣風範孰能加片言獎善存羊
舌尺土酬庸錯犬牙能以精神消沮貳不將恩怨索
疵瑕當年古邑猶書氏乘駟歸來晚節誇

豫讓橋

狀貌聲音兩不疑危機偏伏過橋時千秋精氣長虹
貫一劒雄心老馬知莫道攬衣消積憤尙憑流水託

微詞中行若早隆恩遇同抱堅貞石不移

過古涑水頭懷司馬溫公

潺潺涑水古今流此是先生舊釣遊一代相臣知婦

孺二年正史繼春秋率真會啟耆英聚奸黨碑鐫匠

石羞俎豆翠巖崇報德我來兩度拜松楸

癸丑辛巳兩攝
夏篆會謁公墓

開元鐵牛

在蒲州
西門外

西來紫氣隱濛濛錦纜遙牽跨玉虹扣角何人思甯

戚調元當日溯姚崇河聲寒喘三更月笠影橫吹一

笛風釁啟范陽誰鑄錯空思奮武贊元功

過郭汾陽故里

淵淵鼙鼓振漁陽再造元勳天畀唐知己一生酬學
士故鄉千載祀真王軍容老尙驚回紇都統名先鎮
朔方少華峯高公並壽天孫親與織雲裳

咏古

邑侯

周人龍

春泉

蛟龍困淺水鱗爪苦無施壯士在泥塗庸豎皆侮之
哀哉淮陰侯甘受胯下欺王播木蘭寺鐘聲飯後遲
亦越韓忠武少日志不羈人稱爲將相奮拳直欲麾
古人立功名窮時無一爲及其身通顯經濟竹帛垂

碌碌毀譽輩側目盡稱奇士患不特立皮相奚足嗤

出門詞

昔年別欣然登程心無惱今年別臨歧四顧心如搗
昔別堂上有雙親先期治裝美且好今別依依惟老
母碎線零針傷懷抱八旬大母更就衰愁疾相兼兩
鬢槁大母無別言兒去兒母念吾老但願吾兒春風
得意歸須早兒母無別言兒去兒母多驚擾但願吾
兒關河風雪善自保兒行先已淚暗垂聞言更復心
震悼輿夫催人不得停忍淚吞聲來就道

過王硯亭夫子舊寓有感

人海升沉易感恩六年回首醉公門
我來永抱西州慟公在曾當北面尊
落拓青衫空有淚徘徊舊址枉招魂
只應常切高山仰一瓣心香俎豆存

孟母三遷圖

擇里須擇仁卜居貴卜鄰鄭重慈母心
教子期成人一肩機杼雜圖書老奴前
導子牽裾牽裾問母何處居禮讓村中
好結廬寒窓夜績千絲淚兒能勤學母
志舒一代大賢成名早道統親承尼山
老闕里當年

俎豆嬉均異凡兒競梨棗吁嗟乎畫荻和丸多母教
皆仰高風相繼起我亦永慕在短檠同此賢母愧賢
子

乙卯秋闈分校口占

沉沉鎖院戰初酣累牘盈箱取次探餘勇自矜堪借
一舊巢重到已經三空明心鏡窗虛白繚亂眼花天
蔚藍我是朱衣頻侍側惟期入選盡梗楠

冬至前七日甫抵都又有山右之行書旅店壁
客程催起五更雞呵凍詩仍店壁題鴻爪纔尋燕樹

北馬頭又指太行西
亂峯足底行將徧
殘雪村邊望
欲迷風透重裘寒
似水千杯那得醉
如泥

呈王蘭沚夫子

弟鄉榜房師

仲行問字附侯芭
翹首師門誼最嘉
治譜循聲胸有
竹文壇老輩眼無花
頻因講學親模範
肯爲憐才惜
齒牙最幸後堂絲
竹會也教隨侍絳
帷紗

碣磯靈澤夫人廟

深閨侍妾靜無譁
白刃森森似建牙
一自歸吳徒有
母幾疑忘蜀歎
無家豈知節烈心
猶昔方信婚姻計

本差千載江頭祠宇在靈旗風轉夕陽斜

早眠

教諭

司百川

晝永常無事官閒不厭慵放衙餘落日倚枕待宵鐘
旣省焚膏力還添息氣功春花秋月景都付夢魂中
聞郭陳諸公北上詩以代柬

幽齋兀坐思無端小飲強將意自寬屈指故園誰舊
雨關心冷署此寒官公車豈不懷同上壯志無如已
半殘遙想帝城花正好春風得意讓君看

韓子以七十歲老諸生試明經歸爲其九十壽

母稱觴徵詩於余因爲之歌

七十明經不爲早七十奉母世所少冠帶歸來跪萱
堂右進冰梨左火棗萱堂暫息紡車聲乍睹冠帶心
若驚畫荻丸熊七十載而今始得博恩榮這領青衫
若爲討鐵硯磨穿鬚髮皓從來色養得天多青衫爭
似斑衣好

答憲吉張子卽踵原韻

性淡何妨拙行迂不厭方談心消日永投分引盃長
風襲襟裾冷爐添齒頰香所期惟古道相別莫相忘

秋日同諸幕友出郭小遊卽以觀荷

邑侯賀澍恩雨峰

公餘聯轡出郊坰野色迎人照眼醒
梧葉飛秋涼簌簌荷香搖柄翠亭亭
深林息騎客襟靜清井窺泉地
脈靈倚興巉巖探古寺遠山濃繞佛頭青

其二

炎蒸無計滌煩疴賴有碧池賞芰荷
風葉細傾珠瀑朗露華清散水香多
分明康樂詩新就省識文君酒半醺
我欲褰英憑寄贈田田誰唱采蓮歌

捕狼行

并序

山長

陳錫周

南甫

辛酉秋七月稷山方大熱忽有狼患屢傷人
邑侯沈笠樵明府懸賞捕之狼出沒迅疾如
飛衆以爲神不敢犯明府乃爲文告城隍痛
自引咎一夕村人宿廟中若有物踐已者驚
寤見狼立神前懼噬已欲避之而未及也方
戰栗間狼從容作謝客狀去自後狼頗斂跡
至十一月杪狼遽入城爲害益甚明府且憂
且怒益增重賞捕愈急絳人善獵者聞之攜

火器之稷山道過董村遇兩狼擊之獲其一以獻觀者大悅狼故不甚大而猛悍異常剖腹視之有羊睛及人髮在焉余喜明府之能除民害也爲賦長句紀事命曰捕狼行

稷山大令沈隱侯如保赤子心誠求天和感召疵厲少迎貓祭虎農豐收何物貪狼渺無識梗頑不向深山匿夕陽西下腥風生張牙四野攫人食前途結伴方夜行三人五人走相失村居有嫗止一兒老蚌生珠尤愛惜晚來門外隣語歡抱兒出門衆中立狼隨

人後人不知猛搏兒去救不得大聲疾呼起追狼四
顧不見嗟何及母悲失兒聲號咷居鄰同時皆掩泣
邑侯聞此髮衝冠拔劔叱咤憤填臆自念牧民如牧
羊爲羊驅狼實吾職恨無北平射虎箭去射豺狼如
射蝨回頭懸賞募捕狼大書特書四傳檄又念妖興
每由人狼今爲妖咎誰執平生心跡誓雙清敢信我
躬儀不忒虔心齋袂去禱神真宰上訴通呼吸一夕
神忽召狼來似怒狼貪相譴責當時有人宿廟中開
眼見狼心惕惕豈知狼故不傷人臨去對客如相揖

自後居民慶有鳩數月不見狼行跡何期前夜狼復來窮凶竟向城門入城內城外噬人多血染泥沙賸殘碧斯時邑侯慘不歡益增賞金捕狼急絳人少小爲獵師若有鬼神實憑式朝來持械稷山行驅從多狼董村側天誘其衷猛發機火光迸響如霹靂一狼差小曳尾逃一狼碩大溝中踣負狼入城報縣官狼時奄奄僅微息牙長尾短腰腹粗強梁不與恒狼匹堂下觀者數百人繞狼三匝無間隙已知狼死不復生尙覺餘威咄咄逼須臾奏刀皮肉殊肺腸一一從

剗剔其中獸睛不足數哀哉人髮縷縷黑可憐死者
罹此凶狼竟擇肉恣飽喫設非重賞得勇夫貪殘無
厭將安極我初聞狼心骨悲今日見狼喜動色濡毫
爲作捕狼行語不求工聊紀實憶昔周宣得白狼荒
服來賓天威赫方叔召虎俱賢良將相相輔興周室
方今

聖主

朝委裘瑞象聯珠兼合璧獬豸觸邪虎豹莊豈容貪
狼汚化日今君出手除民害遺種還須掃獾獫士
元信非百里才鸞棲詎久寄枳棘雙熊五馬只等閒

虎頭氣已輕西域會看勲業滿人間麒麟閣上淋漓
墨

民間有狼患余購捕得其一賦此自警

邑侯

沈鳳翔

笠樵

在昔賢守令所在多致祥宋渡九江虎魯感中牟蝗
德化及禽獸何論耕田氓所以千載下嘖嘖稱循良
余生古人後一官山負蟲三載令稷土虎尾心徬徨
催科與撫字夙夜殊未遑冰心雖自慎芻牧慚牛羊
所喜民質樸且復歲豐穰地僻人事稀吾拙聊可藏

方謂田無鼠忽驚野有狼行路未可保入門猝難防
生兒願兒壽狼藉殤路旁哀哉凍餒餘罹此增悲傷
問狼胡爲來感召理孔彰邪正不相入輾轉難爲詳
無乃守土吏失德致天殃我讀循吏傳流汗生背芒
周處遇父老一朝三害除旣殺蛟與虎折節還讀書
嗟予幼失學老至空欷歔又無縛雞力搏獸愧不如
茲事賴神助重賞得勇夫捕此曷足異民害故當誅
得此曷足喜曠官深自虞念狼未獲時獫狁繁有徒
擇肉恣饕餮所遇無完膚爪牙旣足恃黨類復不孤

豈知冥冥內天網非終疎貪殘固天性技窮若黔驢
始假獵人手繼遣庖丁名生殺各有當姑息胡爲乎
恨未償衆命磔此不赦辜除害務除盡遺種將生貙
殷勤故人意長歌實起予

陳南甫孝廉
有詩詠其事

會掃狐兔穴

射獵殲其餘

立春日復得一狼續賦一章

君子崇明德恥爲鷹與鸇鷹鸇逐鳥雀謂不如鳳鸞
我愛仇主簿所見然乎然而若遇敗類養虎安得賢
所以古神聖觀象教漁佃伐蛟有定候攻獸有專官

非干天地和實濟陰陽偏維彼豺狼性怙惡不肯悛
得食恒不足谿壑難爲噍追之非放豚入苙無因緣
望之若瘼犬噬人筋骨穿貪欲蛇吞象姦與狙相連
引類逼處此雞犬不得安解網雖盛德元惡胡容寬
獵人識吾意躋堂來獻豸去年得一狼今日得一獾
屈指卅日內先後踏兩肩方春生氣動多殺豈所便
無奈狼與人其勢無兩全譬如農去草根株須盡捐
不然春風生離離將蔓延寄語捕狼人從禽推爾儼
會看張羅網局陣隨方圓鼃尾躡狼後跋胡兜狼前

母使狡兔脫當同很羊牽一朝而獲十累賞值百千
盡殺無噍類搜剔窮谷巒庶幾四境內婦孺皆安眠
持此語吾民除害茲一端倘遇能語狼請作如是觀

宿烏蘇邨題壁

山長

孫成基

荒村野店不成眠坐守寒燈思悄然竟少窗櫺難覓

月幸從門隙可窺天

旅舍無窗惟於門隙中窺見星月

濕柴愁說煨

紅火破壁驚看透碧烟

時烟氣從壁破中出

聽得雞聲頻起舞

前途快着祖生鞭

曉發烏蘇口占

破曉西風緊衝寒叱馭忙馬蹄踏殘月鴻迹印新霜
道窄車難並僕疲鞭不揚只應肩屢聳得句貯奚囊
歸途仍宿烏蘇店書贈主人

主人喜客酒重溫僮僕懽迎亦候門笑我情長詩苦

短輸渠貌古誼彌敦窗前驚覺雞聲唱

時投宿甚晚未就枕而雞

籌造報邊促曉裝大有勞人草草之感

壁上摩挲鴻爪存好趁月光忙

就道凍雲深處又花邨

題周春泉明府種樹山房詩集

新詩吟徹玉琤琤壇坫得師心久降名世文章原有

數砭人德教本無雙河山三晉囊能括風月一湖筆

獨扛

集內多湖畔
遊咏之作

種樹年來成大器琴堂會看建花

幢

膝下吟

歲貢
管城

每念萱堂奉興嗟忽不禁材同樗櫟散罪負浪濤深
共飯無兼味憐兒欲脫簪寒微空自悼反哺愧鳴禽

其二

白髮何相逼衰殘不自禁母顏童尙似兒髮雪偏侵
日倍堂前愛憂彌膝下深桑榆情共迺喜懼兩關心

乘馬

訪舊懶乘蹇安步過郊野有客向長途揚鞭騁駿馬
馬佚不可羈霜蹄跌路瓦堪嗟揚鞭人顛墜馬蹄下
道傍苦悲酸淒淒淚盈把行人歎息過歎息亦聊且
往者斯已矣叮嗑慎來者

郊行遇風

散步到寒居西風吹塵起塵起撲我身西風吹不已
風塵太迷人不如行且止沿途賦歸來老母倚門俟
面目盡蒙塵問我誰家子

汾水孤舟

舉人

杜若椿

仙子淩淩夜出遊
河汾解纜泛孤舟
三篙水足飄然去
一葉帆輕自在流
樹裏燈光明復暗
船中月色清還幽
神人過訪登姑射
來泊沙灘且暫留

龍門

歲貢

張世昌

雙峯夾處瀉渾流
勝地河山望裏收
浪拍雲根搖日月
濤翻穴底臥龍虬
一川橫據秦關險
兩壁遙連華嶽秋
閒倚欄杆思正遠
茫茫天際下孤舟

登紫金山絕頂過老君庵

昔登龍門山備覽龍門景轉瞬二十載又登紫金嶺
上有老君庵遙瞻空引領尋徑陟層巒蜿蜒藤路永
一峯陡然立似塔孤無影鳥道直穿雲迴環類盤綆
削壁捫蘿度投趾不敢猛目眩怯回頭恐墜心更警
行經陰巖中恍惚陷深井移時從井出峯畔忽露頂
幽壑氣森森逼人毛骨冷振衣造其巔精神始一騁
俯視諸嶂列萬狀皆奧境擬欲問山靈奇勝何年創
開闢盡鬼工鑿斯斤運郢到此縱壯夫色欲變俄頃
意堅志乃伸出險真有幸世路率如此達人須猛省

暮宿山莊與友人夜話

朝遊北山巔暮投山下宿荒村犬吠門歸鳥集林木
有友愛幽居結宇此山麓終日伴漁樵時復事耕讀
見我笑來迎攜手歸岩屋斗酒出風藏列盤陳肴餼
話舊詢桑麻談心輕爵祿更深不成寐問答相往復
燈殘語漸稀窗月淡可掬忽聞風雨聲遠山鳴懸瀑
浮世名利心感此頓驅逐何日謝煩囂從子栖幽谷

方正學先生入廟有感

飛燕南來月半沉

一部靖難紀
以七字包括

孤臣抱恨淚沾襟一

腔熱血酬宗社十族冤魂慘古今
草詔直揮南史筆
荒言足冷北平心
熙朝卹典揚休烈俎豆煌煌重

士林

玉壁懷古

玉壁城頭月滿關
玉壁城下水滿灘
汾水西流自朝暮
明月高懸萬古寒
鄖公戰績炳星日
此地曾盤萬馬
實我來憑弔
緬英風廢壘蕭蕭夕陽殘

來懸甲醉英風
遠壘蕭蕭夕照紅

王壘城東月滿關
王壘城東月滿關

王壘城東月滿關
王壘城東月滿關

王壘城東月滿關
王壘城東月滿關

王壘城東月滿關
王壘城東月滿關

王壘城東月滿關
王壘城東月滿關

王壘城東月滿關
王壘城東月滿關



